

東

華

錄

東華錄

雍正九

臣王先謙敬編

臣周淪蕃恭校

秋七月辛卯朔諭內閣凡各省地方有闕米或米價昂貴者必係其地上年荒歉所致今歲楊文乾奏廣東米貴駐防兵丁有不許巡撫減糶之事宜兆熊毛文銓又奏福建闕米有土棍搶米之事此二省上年俱奏稱豐收並未云荒歉也且據黃國材稱福建積穀見有一百六十餘萬石而毛文銓乃奏請於江西採買米石朕已降特旨令江西運米十五萬石往福建平糶然黃國材謂福建有米而毛文銓則求米於鄰省觀此則當日兩人之交代種種不清可知矣滿保黃國材在福建多年諸事善於掩蓋彌縫或毛文銓被其所愚耳至福建廣東二省地處極邊米穀應作何貯備著

九卿會議具奏尋議福建地處海濱福興泉漳四府人多田少皆仰給臺灣之米自嚴禁奸商販米出境之後民食常苦不足雍正二年奉旨飭發臺灣倉穀每年碾米五萬石運赴泉漳平糶今請再動正項錢糧運米十萬石存貯邊海地方至臺灣商販任許至福泉等府貿易其米船出入海口設禁巡防應令該督撫另行詳議至廣東近經總督孔毓珣以潮州穀少不足碾米給兵惠州穀多又不能出陳易新請撥惠州府倉穀平糶將價銀解交潮州府買穀存貯實裒多益寡之良法應令該督撫將通省倉穀照此斟酌令其多寡得宜以儲民食再粵西梧州二府與廣東接壤產米甚多先經巡撫汪滢奏稱桂林等四府所有捐穀糶三價值不必轉糶還倉請將銀解部經戶部議准在案應將此穀價仍買穀石運交廣東分貯州縣亦足以補益倉儲從之○乙未湖南巡撫布

蘭泰奏衡山縣知縣張翼觀劇飲酒不行轉解人犯並不接受民
閒詞狀應請革職得旨張翼各款俱屬應參之事但稱不肯接受
詞狀此語甚屬錯誤民間詞狀虛妄者多一概接受必啟刁民誣
告健訟之端此風斷不可長若以收受詞狀之多寡定屬員之賢
否則必致以此相尙生事滋擾矣○丁酉諭吏部道府等官有表
率屬員之責必得賢能諳練之員方於地方事務不致貽誤朕愼
重官方雖州縣等官皆審酌補用而於道府尤爲加意非審知其
人才識足以勝任者不輕試用捐例候選人員初任者多於地方
事務從未經歷一旦畀以道府驟膺民社未必遽能稱職暨至不
稱職時督撫糾參反受黜革情亦可憫嗣後凡係捐例候選道府
人員俱著補授各部郎中令其學習辦理至應升道府時令各該
堂官保送引見○戊戌諭直省督撫布按等居官立身之道自以

操守廉潔爲本但封疆大吏職任甚鉅洪範所稱有猷有爲有守三者並重則是操守者不過居官之一節耳安民察吏興利除弊其道多端儻但恃其操守博取名譽而悠悠忽忽於地方事務不能整飭經理苟且塞責姑息養奸貽害甚大蓋此等清官無所取於民而善良者感之不能禁民之爲非而豪強者頌之故百姓之賢不肖皆稱之無所取於屬員而亦不能禁屬員之不法故屬員之賢不肖者皆安之大臣之子弟親戚犯法則姑容而不行參革地方之強紳劣衿生事則寬貸而不加約束故大臣紳衿皆言其和平而望其久留甚至胥吏作奸而不能懲盜賊肆行而不能察故自胥吏至於盜賊皆樂其安靜而不欲其去任暨至事務廢弛朝廷訪聞加以譴責罷斥而地方官民人等羣然歎息以爲去一清廉上司爲之稱屈此則平日模稜悅眾違道干譽之所致也且

操守平常者其心既不敢自恃心懷畏懼頗能整頓經理事務不致曠廢朝廷又留心時時訪察一有不善卽加懲戒而在朝之官員暨伊屬下之官吏紳衿人等皆伺察其過不肯爲之隱諱是以此等之人貽累於地方者尙輕而潔己沽譽之巧宦貽累於地方者更甚也夫操守雖清而皆顧惜情面一味遷就求容悅於人自使內外之人譽之者多若操守既更勝於他人而又能實心任事整飭官民不避嫌怨因而遂不滿眾人之意或謗其苛刻或議其偏執或譏其驕傲故意吹索加以評論此風若不悛改必至封疆大吏皆以實心任事整理地方爲嫌相率而爲苟且之計吏治何所倚賴乎朕深望爾等爲明體達用之全材而深惜爾等爲同流合俗之鄉愿故諄諄誥誡不憚周詳此春秋責備之義勉之懍之

○調邁柱爲吏部右侍郎以明圖爲工部右侍郎哲先爲內閣學

士由郎中遷

○張令璜緣事降調以王沛愼爲吏部右侍郎劉師恕爲

左副都御史

由通政使遷

○己亥諭吏部朕從前曾下諭旨各省道府

州縣之居官好者命總督保舉三人巡撫保舉二人提督布政按察二司各保舉一人密封具奏不得互相商議原以通省人才不少保舉多者不過二三人少者僅一人諸臣於所素知者各拔其尤自然精確督撫提督布按二司皆朝廷大吏受國家深恩自應體朕爲天下得人之意不徇私情秉公薦舉乃其中竟有挾私妄舉者及來京引見俱極庸陋殊非人臣以人事君之義今各員俱已引見爾部可再行文與各省督撫布按二司除從前曾經密舉及朕特旨補授各員外督撫暨布按二司各於道府州縣中明舉一人不得雷同督撫自行題奏布按二司咨呈爾部文到日爾部卽繕摺具奏被舉之州縣官員並令給資來京引見保舉之道府

官員不必來京如有挾私任情草率濫舉者朕必從重治罪斷不姑容○浙閩總督高其倬奏閩省米價騰貴見撥溫台二府倉穀七萬石運往接濟更請於江南淮安等處採買二麥運閩平糶得旨朕因福建米價騰貴已降旨令江西巡撫運米十五萬石前往閩省以濟民食又令九卿酌議閩廣積穀之法今覽高其倬所奏備極周詳李衛又能實心辦事不分彼此均甚屬可嘉著照高其倬所請行並星速行文江南山東二省巡撫卽遣能員協同辦理如高其倬差員未到該撫可借支錢糧豫爲買備務令速發以濟閩省之用○甲辰奉使閩河內閣學士何國宗等條奏河道事宜得旨河南小丹河一件何國宗等與田文鏡嵇曾筠兩議具奏何國宗等乃一己之見田文鏡嵇曾筠身在地方所見必確著照田文鏡嵇曾筠所議行其山東疏濬泉源一件何國宗等議設管泉

通判一員甚是著照所請行山東挑濬馬頰徒駭二河前經陳世倌差委道員徐德倣辦理此處工程緊要徐德倣不稱此任著御史尤清王之錡各管一處聽陳世倌調度不得自立意見其高家堰加修隄工關係緊要若於歲修案內逐漸增修恐致遲緩著照何國宗等所議卽動正項錢糧作速估計興修著九卿會議具奏尋議一河南百泉洹河丹河之水民資其利惟三日濟運一日灌田之舊制實屬有名無實查百泉原分三渠中爲官渠東西爲民渠東口門寬四尺四寸西口門寬三尺六寸請將東口加寬一尺一寸西口加寬九寸其洹河請自石橋東第十洞許民於需水之際自築石壩開渠引水其西三十三洞盡行疏濬則灌田濟運均有攸賴應如所請至小丹河斗門何國宗等請加寬一丈六尺副總河嵇曾筠河南巡撫田文鏡議稱恐山水直下一時瀉洩不及

不便拆造惟將小丹河上下之秦董二渠口門量爲開寬使小丹河出水分灌民田其在內之三十六口門並皆堵塞俾水勢盡入衛河於漕運有益應遵旨照嵇曾筠田文鏡所議一山東運道全賴泉源輸助請令州縣官時加疏濬其額設泉夫因地酌加增減有能濬出新泉者酌給銀米以示獎勵又獨山湖東水土壩南陽湖石閘張穀山口草壩皆以蓄水濟運宜加謹修防一徒駭馬賴二河乃東省運道蓄水之支河宜相機挑濬高津趙牛等支渠水道係民閒溝洫宜於農隙之時令地方官督率民夫挑挖均應如所請一高家堰土隄工程緊要若俟歲修恐致遲緩應遵旨卽動正項錢糧作速興修一恩縣四女寺請建滾水壩一座博平縣運河西岸修復進水閘二座東岸建滾水壩一座濮州境內舊於沙河會道王河之處築有土壩向北開引河以分其勢請將土壩修

築並開濬引河其河西州縣聽民開通水道匯入沙河於運道民生均有裨益一膠萊新河兩岸民田陂水俱藉以宣洩宜開濬深通一濮州等處之魏河聊城等處之洩水河宜聽民間自行挑挖武城縣運河北岸恩縣運河北岸請各挑引河一道均應如所請至所奏柳長河請一例聽民開挖之處查柳長河工程浩大民間果否願行開挖應行令總河巡撫另行妥議具奏從之○乙巳諭內閣前命鄂爾奇繆沅往直隸清查州縣倉穀今據奏稱直隸借糶倉穀弊端種種無非地方官巧爲掩飾虧空之計向來直隸倉穀虧缺甚多朕知之甚悉各官惟恐敗露故設計彌縫詳請借糶此等州縣官員若仍留原任將來假公濟私那新掩舊必至刻剝小民虧欠正項而地方倉廩始終不得清楚可將巧稱倉穀出借各官悉行解任著吏部將投供到部候補候選之州縣官俱帶來

引見朕親自選定人數其鄂爾奇等已經到過之正定順德大名
廣平保定五府所屬贊皇等二十一州縣著卽將揀選人員掣籤
發往鄂爾奇等未到之永平宣化順天三府所屬之二十一州縣
俟伊等到彼查出有出借倉糧者卽咨吏部令籤掣人員前往代
之以上各州縣借出之穀俱著解任之官員自行催還以一年爲
限限內全完者仍准卽行另補若先期速完者隨到隨卽另補逾
限不還者治以那移虧空之罪如此則虧空之員不得復居見任
挾制小民那移出納而接任之員交代井然又無前後不清之項
若果係借欠在民按數催還其原官仍可另補於公私均有裨益
又鄂爾奇等奏稱阜平贊皇等處違例將穀借給兵丁向來有無
借給兵丁之例著九卿查明具奏聞直隸各處倉廩久未修理傾
圯者多著李紱嚴飭各屬設法速行修整尋議米穀原無借給兵

丁之例或貧乏兵丁於青黃不接時該管官出具印文借支季米至支放秋糧時扣還今贊皇等處借給兵米應令該督會同該管總兵官查明再嗣後直省州縣遇借給民糧之時或有兵丁需借米穀者許具該管官印領借給於支兵糧時扣還儻有私領冒領私給擅給等弊各按律治罪庶兵丁無匱乏之虞倉穀亦免濫給之弊從之○諭大學士等據弘春所奏阿其那曾得過允禔銀二十萬兩塞思黑於康熙六十年曾得過允禔銀六萬兩阿其那僞爲矯廉而利允禔之貪惡以供其多取廉潔之人乃忍心害理至於此乎且得銀如此之多不審從前何功於允禔而當之不愧嗣後何以酬其贈而受之不疑至塞思黑當康熙六十年得揆敘家之銀已百餘萬而允禔尙以六萬兩予之塞思黑竟受之均屬可詫著將弘春此奏及順承郡王問阿其那回奏之語一併與滿漢

各衙門觀看○丁未諭內閣從來流言之傳播皆起於奸宄之徒欲擾亂政事顛倒是非故造作無稽之語煽惑人心流布遠近間或國家舉行一事因流言而中止而造作之人益自以爲得計肆其伎倆此等爲害不可勝言朕卽位以來外間流言有謂好鈔沒人之家產者有謂輕聽風聞之言以爲黜陟用舍者不得不以其故曉諭眾人知之從前貪賊犯法之官蠹國殃民罪大惡極卽立置重典不足以蔽其辜但不教而殺有所不忍故曲宥其死已屬浩蕩之恩若又聽其以貪婪橫取之貲財肥身家以長子孫則國法何存而人心何以示儆況犯法之人原有籍沒家產之例是以朕將奇貪極酷之員鈔沒其家產以備公事實資之用此等兇惡之人本身應正典刑家產鈔沒妻子皆當遠徙者朕皆從寬赦免而止於鈔沒其贓私尙保其性命卽本人稍有人心應知感恩戴

德何得因鈔沒而生怨望乎且朕臨御以來覃敷恩澤蠲免錢糧不下數百萬兩賞資兵丁及各地地方興利除患所費亦不下數百萬兩皆中外所共知者夫以額徵錢糧及內庫帑金爲數如此之多朕尙毫無吝惜豈反爲此貪官污吏些微之財物以啟小人之議論乎卽如年來鈔沒之人不過是年羹堯滿丕李英貴何廷圭等及阿其那塞思黑等門下最用事爲非之人耳此皆奸惡顯著之徒法無可貸有何屈抑而爲之不平乎至謂朕喜聽風聞之言以爲黜陟用舍此語亦屬愚昧蓋因十數年來人情多詐每遇薦舉參劾多有情弊不出公心重負我 聖祖仁皇帝集思廣益之至意是以 聖明洞鑒隱微不輕聽信於是懷私者旣畏懼而不敢言謹慎者又避嫌而不肯言彼此緘默遂成積習朕卽位以來常思 聖祖仁皇帝以天亶聖人臨御六十餘年一切政治經

宸衷獨斷無不盡善若朕則辦事之初必須公聽並觀盡去壅蔽庶能合於機宜而又恐大小臣工有所牽制而不敢直言有所瞻顧而不便明言是以令其密摺具奏及發與廷議有裁去本人姓名者無非欲諸臣無所回護直言無隱使下情盡能上達利弊悉能周知全無壅蔽之患永享昇平之治也至於密奏中薦舉參劾者朕原未常輕信必細細留心訪察確有證據眾論僉同然後加以黜陟用舍未嘗因一人之奏而卽定其人品見諸施行不知者以爲輕聽風聞而朕則慎重周詳務求實蹟也以上流言二事皆係阿其那塞思黑允祿允禩等同黨之小人心懷私忿故造狂悖之語蠱惑人心擾亂國政更有一種貪贓犯法之徒畏懼鈔沒參劾是以造作此語傳播遠近希冀因流言而停止自古治天下之道發政施令止論理之當行事之當行與否悠悠之口何足爲憑

朕之此心可以對越 皇考可以對越 上天可以告天下億萬

臣民而一二奸邪小人乃欲挾其如鬼如蜮之伎倆以惑眾聽而
撓公事朕豈肯絲毫爲此輩流言所動乎天下之人奸惡者少而
善良者多造作流言者少而誤聽流言者多彼奸惡之徒造作流
言實自作之孽儻經緝獲按律在所必誅此外善良之人當共知
朕心勿爲邪說所惑其偶行鈔籍也實於懲貪罰惡之中尙寓寬
仁之意其廣行採訪也實欲收好問好察之益以爲政治之資朕
之宵旰憂勤無非爲國是民生思久安長治之計天下之人豈忍
聽宵小狂悖之言而忘君上高厚之恩哉○諭貴州仲家苗肆行
不法十餘年來擾害平民朕知之甚悉石禮哈方署巡撫卽務卽
奏稱應行征剿馬會伯到任亦奏與石禮哈相同朕恐石禮哈年
少孟浪用兵之事不可輕舉未卽允行何世璠到任則奏稱苗人

應行招撫不必用兵而武員好大喜功貪圖議敘且狎家苗藥箭
鋤利地勢險阻亦不易於成事等語丁士傑所奏大槩亦與何世
璣同朕曾下旨與何世璣卽令其招撫而何世璣並不能有所招
撫及高其倬到京亦面奏應行征剿以靖地方朕又降旨與鄂爾
泰亦奏稱用兵爲是以令石禮哈馬會伯協同辦理然此事甚
有關繫朕心時時廑念今據石禮哈奏報谷隆長塞者貢羊城壘
等處俱已攻破首惡阿革阿給及爲從兇苗川販等亦俱就擒朕
心甚爲喜悅何世璣未必能審究此案著將各犯交與鄂爾泰審
究分別定議並安插撫恤使地方永遠甯謐不受惡苗之擾一一
經理具奏石禮哈俟事竣照例議敘外今先沛特恩著將伊父石
文焯革職之處復還以示朕賞功推恩之意○諭刑部國家立法
本以懲兇暴之徒而因事原情則時深惻隱之念書云宥過無大

刑故無小所以斟酌權衡用廣好生之德也朕慎重刑罰矜恤下民每遇讞鞠之案往復披覽至再至三求其可生之路嘗見各直省命案內或緣細事起爭或因護親情急或已經退避而毆者勢不相容或本意恐嚇而誤傷者遂致莫救其誤傷之中有經報官保辜者亦有未經保辜者有延至數日殞命者亦有延至數十日殞命者當其爭角之時止知乘憤直前豈計因傷致斃按律抵罪法所當然但念蚩蚩愚氓因一朝之忿頓罹重罪每詳閱案情朕心實爲不忍且秋審時凡情輕之案多以情可矜原減等發落今特沛殊恩予以自新之路見在各省具題到部已未入秋審案內除情由可惡者不准寬免外其餘一百七十七名俱著釋放分別有力無力照追埋葬銀兩給付死者之家此朕格外生全浩蕩之恩爲舊例之所未有凡茲小民當體朕省刑宥過之慈懷身受者

力圖改悔以贖前愆旁觀者觀感提撕時存儆醒父訓其子兄勉其弟比閭族黨互相勸勉各安本業不犯王章則是朕之法外加恩與小民之望外受恩均爲移風易俗之美事儻以爲法網寬恕希圖倖免不改其好勇鬪狠之習重負朕牖民遷善之心則格外之寬典豈能屢邀而異日之追悔亦屬何益爾部將此行文各該地方官徧行曉諭務使鄉里愚民盡皆知悉○辛亥 御書忠敬誠直勤慎廉明扁額賜怡親王諭大學士九卿翰詹科道等朕自卽位以來怡親王事朕克殫忠誠至純至恪事事爲朕實心辦理而朕委任之處甚多約畧舉之職掌之大而且繁者有九議政關繫機密戶部掌領度支三庫總理出納興修畿輔水利以厚民生管領漢侍衛以育人材至於諸王子之事務舊邸之事務以及督領圓明園八旗守衛禁兵養心殿監理製造鉅細事件皆一人經

畫料理而怡親王公爾忘私視國事如家事處處妥帖能代朕勞
不煩朕心蓋其忠君親上之念肫懇篤摯是其忠也小心兢業無
纖毫怠忽是其敬也精白一心無欺無僞是其誠也直言無隱表
裏如一是其直也黽勉奉公夙夜匪懈卽如目今王雖身抱痾疾
而案牘紛紜披閱不倦朕聞之實至於不忍是其勤也一舉未嘗
放逸一語未嘗宣漏是其慎也清潔之操一塵不染是其廉也見
理透徹莅事精詳利弊周知賢愚立辨是其明也是以朕特書忠
敬誠直勤慎廉明八字賜之惟朕深知王之德洞悉王之心覺此
八字實不能盡其美善亦無一毫過量之詞若有一字不確不切
是朕之頒賜非嘉獎之詞乃譏諷之語矣朕不爲也且朕賜此八
字乃就怡親王事朕之大端而言至於王之當年侍奉 皇考極
盡誠孝深蒙 皇考之慈愛而其居心之方正秉性之和平待人

之寬厚遇下之仁惠種種善行筆不勝書朕觀爾等在朝諸臣於忠勤愼明四字尙多有之若敬誠直廉四字朕則未能輕許向後咸當奮勉砥礪以副朕望○諭內閣從前江西巡撫裴率度以該省州縣虧空係民欠居多請交與接任官徵催具奏今聞德安縣知縣蕭彬虧空並互揭知府李敬熙鹽驛道孫蘭苾詐贓一案司道揭報後裴率度遲延兩月始行題參又武甯縣廖科齡已參虧空之後知府張景偉查伊任內已徵未解地丁等項銀六千餘兩捏稱有民欠可抵申報裴率度不行確查將虧空徇庇官員續參反令知府代完銀四千兩餘銀勒令新任知縣方聲亮出結認徵夫以已徵在庫知縣虧空之項重複徵之於民若百姓依限完納則有一糧再輸之累或接任催徵不前勢必那新補舊冀免處分見收錢糧又致虧空將來彼此那移及離任盤查之日皆以民欠

藉口國帑虛懸州縣牽累似此者直省不計其數裴率度身任封疆理應將此等積弊釐剔清除乃爲虧空之員蒙蔽巧隱令知府徇私料理以沽寬厚之名殊乖大臣公忠之道此事須派欽差前往將此二案徹底審究前候補知府王景望條陳請令抑勒交盤者毋庸揭報上司直揭部科轉咨督撫審結報部如後任枉揭者嚴加治罪等語此處著九卿會議具奏尋議嗣後州縣抑勒交盤者許揭報督撫題參或督撫司道護庇離任之員知府顧慮分賠抑勒交盤者許直揭部科儻接任官容隱不報者將欠項坐令賠補其出揭之員調任他省上司有多方誣陷者許赴都察院呈辨庶交代積弊可除州縣侵蝕漸少從之○命孫柱蔡珽俱專管兵部事以查弼納爲吏部尙書仍管內務府總管事楊名時爲吏部尙書仍留雲南巡撫任○以兵部尙書法海協辦禮部尙書○宗

人府議奏平郡王訥爾素在西甯軍前貪婪受賄應永停俸祿得旨訥爾素行止卑污貪劣素著及署大將軍印務更肆婪贓索詐地方官銀兩朕向卽聞之因訥爾素與允禩不和朕意與允禩相善之人故爲播揚欲傾陷訥爾素所以未卽深究治罪且加恩令辦理上駟院事務乃伊並不追悔前愆仍犯法妄行情屬可惡若仍在王列則於諸王有玷著將訥爾素多羅郡王革退在家圈禁其王爵令伊子福彭承襲○甲寅增壽絲事革職調常保爲盛京工部侍郎轉明圖爲工部左侍郎以哲先爲工部右侍郎桑格爲內閣學士由郎中遷○乙卯吏部遵旨議覆保甲之法十戶立一牌頭十牌立一甲長十甲立一保正其村落畸零及熟苗熟種亦一體編排地方官不實力奉行者專管兼轄統轄各官分別議處再立民間勸懲之法以示鼓勵有據實首告者按名數獎賞隱匿者加

以杖責應通行直省以文到半年爲限有能舉首盜犯者免罪其
從前未經發覺之案地方官卽行揭報者亦免議處至盜案疏防
文武各官處分除山海大盜土獍蠻苗及響馬老瓜等賊勢難擒
捕者文武官照舊例處分若盜至十人以下者文職照例處分外
武職各官酌量分別寬減惟未獲盜首者專汛官仍照定例處分
得旨依議通行各省文到半年爲期甚迫著以一年爲限○丙辰
吏部議准浙江巡撫李衛奏湖州府烏程縣所屬之烏鎮地方界
聯二省三府接近太湖易藏奸宄請將湖州府同知移駐烏鎮以
資彈壓從之○戊午諭內閣朕昨覽湖廣安陸府屬有一縣名卽
係 景陵二字見之心甚不安該省督撫不具奏請改於心獨安
乎此縣名著內閣擬改請旨尋內閣撰擬具奏得旨著改爲天門
縣○己未諭刑部律載鬪毆成傷定有保辜之限所以重民命也

被毆之人受傷雖重尙可醫救一經移動勞頓冒風或致殞命嗣後關毆傷重者禁止移動著問理衙門委官親詣驗看使被關之人得以安卧醫救不至誤傷性命其應如何定例通行之處著三法司詳議具奏尋議凡京城內外有關毆傷重者該衙門卽委官親詣驗傷就取確供定限保辜其被傷之人擡赴衙門驗傷之處永行禁止違者將該管各員治罪從之○禮部題河南杞縣壽民蕭俊德年屆一百十八歲應照例給銀三十兩建坊得旨蕭俊德年過百齡之外實屬希有之事著於定例賞賜坊銀外加增兩倍共賞銀九十兩以示特恩嗣後年至一百一十歲者加一倍賞賜一百二十歲者加兩倍更有多得壽算者按其壽算加增著爲定例○刑部等衙門審奏天津州民郭允進捏造狂悖不經之語肆行訕謗大逆不道應凌遲處死得旨郭允進捏造悖逆之詞詛咒

朕躬尙無叛逆實蹟若照部議將謂朕因怒而加以極刑矣郭允進著改爲立決梟示

八月庚申朔諭吏部戶部直隸地方旗民雜處猾吏舞文太監戚屬散處州縣兼皇莊王公等莊屯全在其間地方官往往掣肘今直隸虧空倉糧四十二州縣特行揀選人員命往令其清理倉庫整飭地方但直隸書吏積弊凡新官到任一切文卷悉行藏匿州縣官因限期嚴迫急而求之方始取出由是墮其術中以後事件皆任其把持爲害甚大州縣官能鉤致其隱而重置之法者不可多得錮弊相仍朕知之甚悉已諭令總督李紱嚴查但流弊旣久命往各官徹底清查必需時日一切案件勢難依限完結恐有遲延之虞著將直隸各州縣見在欽部案件一年之內暫行寬限庶各員得以從容釐剔積弊可除再直隸州縣太監之父兄弟姪在

地方不無生事本人亦未必盡知可令該州縣大事照例詳報總督具題小事徑報內務府內務府傳該太監曉諭令其自行約束如仍不悛改內務府卽酌量懲治內府大糧莊頭並諸王大臣莊頭如有生事梗法之處大者仍申報總督具題細微事件屬內務府者申報內務府懲治其餘莊頭人等申報都察院轉行各該管官員懲治不必奏聞再畿輔重地理宜嚴肅乃近來盜案較他省居多定例強盜不分首從皆斬立法甚嚴當年 聖祖仁皇帝法外施仁凡有盜案命大學士會同三法司覈擬止將爲首起意並傷人之犯擬斬餘俱減等發落乃不法之徒不思感激愈肆玩法甚屬可惡自雍正五年正月初一日爲始直隸盜案事發仍照舊例不分首從皆斬直隸盜賊不盡係直隸之人著行文各省督撫出示徧行曉諭使皆知所畏懼毋致自投法網如此於弭盜似有

裨益此次命往人員果能清理錢糧擒拏盜賊不畏強禦設或被
人挾讎誣陷致遭參處者赴都察院控告都察院卽代爲奏聞如
果屈抑朕必爲伊等主張斷不令無辜受累也○辛酉諭八旗大
臣等侍郎一官係辦理部務大臣職任與副都統相等嗣後按班
坐立之處俱令在滿洲副都統之次蒙古漢軍副都統之上○癸
亥諭直省督撫等數十年來各省錢糧虧空甚多朕曾降諭旨寬
限三年令督撫催追完項至今未見有奏報料理就緒者惟原任
直隸總督李維鈞曾於去年奏稱各屬地丁銀兩俱已彌補惟倉
穀尙畧有缺欠冬春之間卽可補足及去秋畿輔水澇歉收須用
穀石賑濟而倉穀存者甚少今夏遣官訪查各屬虧欠一一顯露
倉穀如此則庫帑之虧缺可知矣李維鈞之罪誠無所逃據此則
他省之錢糧不能清楚顯然可見該督撫等特遲緩不行奏報耳

又如各省虧空動稱無著之項夫錢糧未經徵收則欠在民已經徵收而有虧空則欠在官州縣力不能完則上司有分賠之例本人雖已病故而子孫有應追之條何得藉口無著以虛國帑從前彌補虧空皆指俸工銀兩及朕有旨不許捐輸俸工則皆稱以耗羨抵補夫耗羨亦出於民乃不問當日督撫等所以致此虧空之由而動稱耗羨彌補以百姓之脂膏飽有司之谿壑豈朕憫惜元元之至意乎今特沛寬恩凡各省虧空未經完補者再限三年務須一一清楚如屆期再不全完定將該督撫從重治罪如有實在不能依限之處著該督撫奏聞請旨又如前年原任浙閩總督滿保曾具摺奏稱梁龍任內虧空銀六萬兩係 聖祖仁皇帝南巡時所用臣不便露此情事彼時朕卽批示云當年 皇考南巡屢降諭旨絲毫不取給於地方凡行在所需悉由內府豫備食用等

物俱發官價採買賞資銀兩皆從司庫支給嚴禁地方有司不許與扈從人員交結往來私相餽送違者以軍法從事立法甚爲嚴切卽或修理一二處行宮亦皆本地方情願豫備而所費亦屬有限何至虧空多金歷二十年之久不能清結我皇考及朕所行之事無不可告天下臣民其當年南巡時如何費用之處爾可據實直陳而滿保理屈詞窮不能回奏蓋此等銀兩皆當日地方官結交匪類餽送知交暮夜鑽營恣意花費及至虧空敗露則動稱因南巡時用去伊等違背皇考聖旨擅動公帑以結私交目無國法其罪已不容誅而又敢藉口南巡將虧空之故推卸於君上以寬己罪此尙得謂有人心者乎又如山西河南兩省昔年虧空甚多俱稱應辦軍需所致凡軍需所用皆有正項錢糧何至累及地方有司此皆平日地方官不能大法小廉下吏侵漁上司需索

以致國帑久虧反借支應公事之名以掩其侵盜之實深可痛恨嗣後直省督撫等當祇遵朕訓仰體朕心共矢公忠盡除舊習以副朕委任封疆之意○賑湖南臨湘岳州等縣衛水災饑民○乙丑諭內閣數年以來蔣廷錫協同怡親王辦理戶部事務秉公執正釐剔諸弊甚屬盡心而胥吏宵小徇私作弊之人未必無疾妬懷怨者今蔣廷錫入閣典試或乘此造作浮言妄加謗議亦未可定科場關繫大典若聞中閱卷果有不公許應試舉子赴都察院控告奏聞若有不軌之徒假捏污蔑之詞以洩私憤而撓公事則國法斷難寬宥著步軍統領及順天府府尹五城御史密訪嚴拏參奏從重治罪○雲南巡撫管雲貴總督事鄂爾泰奏滇黔大小文武各官謹實據所知開閱進呈諭泊天下惟以用人爲本其餘皆枝葉事耳覽卿之奏非大公不能如是非注意留神爲國家得

人不能如是非虛明覺照不能如是朕竇嘉之但必明試以功臨事經驗方可信任卽歷經幾事亦止可信其已往猶當留意觀其將來萬不可信其必不改移也卿等封疆之任古諸侯也閩省竊伺投其所好往往掩其不善而著其善粉飾欺隱何所不至惟才之一字不能假借凡有才具之員當惜之教之○諭停今年秋決

○丁卯祭 先師孔子 上親詣行禮祭畢諭禮部侍郎三泰太常寺卿孫卓曰儀注內開獻帛進酒皆不跪朕今跪獻非誤也若立獻於 先師之前朕心有所不安可記檔案以後著照此遵行

○戊辰諭內閣從來直隸江南兩省盜案多於別省是必有爲首積盜糾合匪類巧於漏網各州縣被竊之處雖多而奸猾之盜首不過數人窩藏之巢穴亦不過數處而已畿輔之地爲四方觀瞻豈可聽宵小之潛藏任有司之疏忽李紱職司表率安可漠不關

心可速飭屬員嚴加緝捕務令得其根柢以清盜源若仍前疏忽定將李紱治罪並諭直隸提鎮等官各飭弁員稽查防汛以靖地方毋得疏縱自干罪戾在京步軍統領衙門及巡捕營弁五城御史司坊官員各宜盡心緝訪以副詰姦弭盜之職○己巳 上御經筵○吏部議奏署理大學士事務戶部尚書徐元夢繙譯本章錯誤應革職交部治罪得旨徐元夢在內廷行走多年從寬免其交部著革職在內閣學士之列辦理票籤本章一切繙譯事務效力行走○賑湖廣武左等縣衛水災饑民○河南巡撫田文鏡奏報瑞穀得旨據田文鏡奏進豫省所產嘉穀有多至十三穗者此實罕見之事大凡爲督撫者果能殫心竭力爲國爲民必能感召天和化災稔而成豐稔前歲畿輔偶旱李維鈞奏稱欲用法術祈禱比時朕卽降旨止之蓋無實心實政感格上天而仗法術以爲

所求焉有感應之理又如畿輔地方常有水患怡親王親身相度
悉心籌畫爲國爲民之念實爲誠切故今歲六七月間大雨時行
之際直隸地方雨澤調勻凡開濬修築之處皆得施工而禾麥又
復豐登民生樂業豈非至誠感通之驗乎朕非以地方之事卸責
於督撫凡屬督撫皆朕簡用之人若督撫盡心於地方則是朕用
得其人伊之功卽朕之功若督撫不盡心於地方則是朕用非其
人伊之過卽朕之過督撫受朕深恩委以封疆重寄乃悠悠忽忽
不加意於吏治民生而轉令朕代爲受過清夜捫心亦忍爲之乎
督撫若有此等不但伊身難逃國典卽冥冥之中子孫亦必受譴
罰勉之慎之○癸酉解許容任以塞欽爲陝西按察使由戶部郎中遷○
甲戌添設內閣漢侍讀二照滿洲蒙古漢軍侍讀品級授爲正六
品○庚辰裁山西朔平府總捕理事同知旗民爭訟事務歸併朔

平府糧餉同知兼管○辛巳諭內閣各處監督俱由該部院堂官保舉派出之後著原保題之堂官時加訓誡訪察若有劣蹟許據實參奏免其治罪儻由別處發覺則將原保題之人一併治罪如此部院堂官必慎加揀選而派出之監督亦知所畏懼不敢妄行矣○壬午兵部議准奉天將軍噶爾弼奏旅順口至鳳凰城水程幾及千里止有旅順水師一營請添設水師營三處每一營兵丁三百名各設佐領一防禦二驍騎校三令其管轄連絡巡哨以固海疆從之○癸未召張楷來京陛見加長蘆鹽運使陳時夏布政使銜署江蘇巡撫○召甘汝來來京陛見以韓良輔署廣西巡撫

由提督署

○召圖理琛來京陛見以岳鍾琪兼署西安巡撫

由川陝總督兼署

○乙酉傅鼐緣事革職以王朝恩爲盛京戶部侍郎

由內閣學士遷

○丙

戌諭諸王大臣內閣九卿等我

皇考聖祖仁皇帝三年大禮已

滿朕追念罔極 深恩欲於 皇考忌辰每歲遵照三年以內祭祀之禮永遠舉行恭讀祝文用申誠悃朕受 皇考教育慈恩至深至厚終身永慕無有窮期豈三年禮制之所能限况天下億萬臣民感戴 皇考深仁厚澤六十餘年自古帝王罕能比並一切禮儀亦非定制所得拘也朕舉行此禮乃自展其思慕誠切之衷至與舊制相合與否朕皆不遑計及此禮亦惟朕躬特行之於我皇考後世子孫不得奉爲成例其應行禮儀著該部定議具奏

○諭內閣國以民爲本民以食爲天朕卽位以來念切民依舉行耕藉之禮殫竭精誠爲民祈穀於上帝乃雍正二年三年藉田特產嘉禾有至一莖九穗者朕心亦以爲偶然之事今據府尹劉於義進呈今歲藉田所產自一莖雙穗三穗以致八穗九穗皆碩大堅好異於常穀朕見心甚慰悅特令宣示廷臣朕並非以此爲祥

瑞誇耀於眾也蓋實有見於天人感召之理捷於影響無纖毫之
或爽朕以至誠肫懇之心每歲躬耕藉田以重農事卽蒙上帝降
鑒疊產嘉穀以昭休應似此八穗九穗之穀豈人力所能強爲亦
豈人君所能強之使有乎天人感應之理朕見之最真最切但恐
此心不誠耳誠則未有不動者卽如從前青海蠢動朕爲邊陲憂
慮虔禱於宮中不數旬而捷音卽至疆宇甯謐又如前歲夏間近
畿雨澤稍愆朕在宮中默禱減膳修省虔誠叩懇不數日而甘霖
渥沛禾稼有秋此皆近年以來朕親行親驗之事至去年夏秋之
間時常陰雨而李維鈞並不將畿輔被潦實情具奏是以朕未曾
早爲虔禱殫竭誠心以挽天意而紓民困及蔡珽署直隸總督事
務詳悉奏聞朕宵旰憂勤幾廢寢食於是截漕發倉多方賑濟京
城設廠各邑興工俾窮民皆得餬口是以地方雖被水災而小民

不至流離失所今歲二麥豐收禾黍暢茂此皆上天俯鑒朕衷故
加惠黎元而錫以盈甯之慶也蓋天生民而立之君鑒觀在上人
君一念敬謹政事無關天必嘉之佑之一念放逸政事有乖天必
儆之戒之此一定之理也況人君撫馭臣庶位處極尊所以賞罰
之者獨有上天耳是以朕每於水旱等事皆實心內省至於各省
旱澇之事朕皆事同一體原無彼此之別惟是地方相隔路遠彼
地偶有水旱有司未必卽行具報及至奏達朕前而緊急之時已
過是以朕無從盡其誠心爲之祈禱此其責則全在本省督撫矣
督撫受朕委任之事爲朕養育萬民必視百姓之疾苦如痛癢之
在己身一遇水旱饑饉必思所以致此之由或因本省之政事更
治有關卽思速爲改易之或因本地之人心風俗不端卽思速爲
化導之兢兢業業修省祈禱竭盡誠心一如朕之朝乾夕惕斷無

不可以挽回天意者假若聞朕之政治稍有闕失亦卽直言陳奏不必隱諱如此則官與民聯爲一體臣與君又聯爲一體太和翔洽實意交孚天聽雖高誠呼吸可通矣朕每歲躬耕藉田並非崇尚虛文實是敬天勤民之至意禮曰天子爲藉十畝諸侯百畝據此則爲耕藉之禮亦可通於臣下矣朕意欲令地方守土之官俱行耕藉之禮使知稼穡之艱難悉農夫之作苦量天時之晴雨察地方之肥磽如此則凡爲官者皆時存重農課稼之心而凡爲農者亦斷無苟安怠惰之習似與養民務本之道大有裨益著九卿詳議具奏○諭吏治惟在得人而各省有司員缺甚多非廣收博取不足備庶官之位故數年以來各省官員經朕揀選命往者亦多然當其揀選之時或見其奏對明白舉止從容或見其條陳事宜似屬可採遂入於揀選之中命往各省以試用之又有奉旨特

用之員大約因督撫上司等薦舉保奏朕召來引見見其才具可用遂加遷擢以鼓勵之此等人員朕不過取拔於臨時並未曾試驗於平日實不知其居心行事何如也伊等莅任後自應倍加敬謹勉爲良吏方不負朕格外之恩若自恃爲揀選特用之員傲上陵下恣意妄行而該管上司以爲朕所揀選特用之員不加約束委曲寬容則大非朕激清吏治整飭官方之意矣朕以大公之心撫馭萬方凡屬臣工止論其居官之賢否以爲進退豈以部選揀選常用特用分別異視有所偏向凡爲督撫者宜深知朕心切勿以其爲揀選特用之員有意優待而姑容之儻居官不善卽據實參奏不爲隱蔽不涉瞻徇如此則人皆知做官皆得人而於吏治大有裨益矣○諭朕欽恤刑獄每遇讞決無論罪之輕重必原情酌理再三推求務使情罪允協又念罪人幽囚叢棘易致瘵斃屢

諭問刑衙門修整監獄督責禁卒不時灑掃潔淨遇有疾病必加調治務令痊可此亦矜恤罪囚之一端也乃近聞各省本章監斃人犯不少多由羈禁之處跼隘倒敝以嚴寒酷暑侵骨刻肌潮溼穢惡氣薰蒸傳染之故也況監獄不固防禦多疏罪人越獄脫逃亦所不免特飭各直省督撫通查所屬監獄逐一修葺並高築牆垣以資防範其地勢低窪者改造高厚之處狹隘者酌量刑獄繁簡展寬蓋造凡枷號暫羈之門戶倉所亦必繕治完固正印官仍不時稽查毋令獄官獄卒任意陵虐懈弛疏防如此則罪人不致殃病而監禁既固亦可免越獄之虞該督撫俱各仰體朕好生至意督令有司遵行毋忽○丁亥直隸總督李紱以塞思黑於八月二十四日病故奏報 上召諸王大臣等入諭曰今日李紱奏報塞思黑病故塞思黑素性奸惡行止陰邪當日與阿其那允祿

允禔結爲死黨與其妻父七十及蘇努阿靈阿等互相固結潛蓄邪謀助塞思黑肆惡無所不爲在皇考時種種不孝之罪難以枚舉及皇考升遐之日朕正在哀痛之際塞思黑突至朕前其踞傲慢而坐意甚叵測皇考大事之中凡祭奠行禮之處塞思黑從無涕泣悲戚之狀顯露怨望辭色朕知其素行兇殘若留在京必生事端是以發往西甯居住伊在途並無悔過之意與伊子副什渾及勒什亨等一路嬉笑如常毫無畏懼且與允禔等舊日邪黨仍不解散起身之日收受允禔馬匹私相往來及到西甯之後寄與允禔書信有機會已失追悔無及之語視朝廷如同敵國造作字樣巧編格式密縫於羸夫衣襪之內暗傳信息又數十年前有一山西無賴生事之窮民流落在京塞思黑欲收爲心腹令伊太監幫助銀十兩其人感激思恩及塞思黑居住西甯其人公

然到伊寓所投遞書帖稱願輔有道之主不附無道之君欲糾合川陝兵民以救恩主等語乃塞思黑聞此大逆無道之語不但不行出首且向其人云我兄弟無爭天下之理並屬勿令楚宗知之唯恐其人受累似此狂悖妄亂包藏禍心日益加甚其罪難以悉數又如伊在西甯時將伊所用太監撤回京師伊每人賞與金條及西洋金表等物皆貴重難得之物是伊獲罪之後尙私買人心目無國法肆行無忌諸王大臣等屢次奏請卽行正法以彰國憲朕心尙在遲回不忍卽定因其不便再留西甯故令伊回京治罪伊一路毫無改悔戒謹之心談笑如常因復令暫禁保定以觀其行止前李紱奏稱伊患腹瀉之疾比卽降旨令李紱揀選名醫調治不料伊惡貫滿盈獲罪 天 祖已伏冥誅可見善惡之報捷如影響似此不忠不孝大奸大惡之人雖未受國法亦不能逃天

譴也著李紱爲伊料理棺衾殯殮之事俟其妻子家口從西甯搬
到保定之日再行奏聞請旨又諭塞思黑病故著尙書法海馳驛
速往西大通將塞思黑之妻子家屬盡行帶至保定府著派太監
二人隨法海前往約計塞思黑妻子何時可到保定府豫先奏聞
朕另有旨又諭朕從前差胡什禮前往帶領塞思黑回京伊並未
請旨私與楚宗商議擅將塞思黑用三條鎖鎖拏彼時奏聞之際
朕將楚宗等摺奏發諸王大臣等公看並將塞思黑鎖拏之處詢
問諸王大臣據諸王大臣僉稱塞思黑係獲重罪之人應當鎖拏
等語及胡什禮到京回奏述李紱有俟塞思黑一到我便宜行事
之語朕聞之駭異斷以爲不可特命胡什禮星馳前往諭之又於
李紱奏摺中硃批嚴飭之李紱奏稱並無此語胡什禮楚宗從前
不待朕之諭旨私將塞思黑鎖拏後又故意將鎖寬鬆任其脫卸

曾經李紱奏聞彼時朕卽欲將胡什禮楚宗拏問治其任意之罪
又恐眾人不知或因此謂朕欲寬待塞思黑或因此謂朕欲加嚴
於塞思黑又致妄存意見是以暫行停止未曾究問今塞思黑既
伏冥誅則從前胡什禮楚宗等擅將塞思黑上鎖後又私自寬釋
明係有意欺罔罪不可追著將胡什禮鎖拏交副都統御史常泰
帶往保定並將楚宗鎖拏一同明白嚴審具奏卽將二人留於保
定候旨○戊子諭諸王大臣等阿其那塞思黑罪大惡極天下共
知諸王大臣等屢請將伊等卽行正法以彰國憲朕意遲回不忍
卽定今塞思黑已伏冥誅昨聞奏報朕心惻然今欲將阿其那從
寬曲宥諸王大臣等以爲何如著各秉忠誠陳奏並詢直省將軍
督撫提鎮等亦令其各抒己見具奏○己丑諭諸王大臣等朕將
塞思黑之事交與楚宗楚宗始初所奏一二事件尙有實心題勉

效力之意朕料伊久在軍前年齒加長必能改易前行用加信任
畀以殊恩乃楚宗將一二事件致朕信任未久遂奏稱塞思黑邀
買人心大有關繫斷不宜處之極邊應拏送京城禁錮等語似此
明係見民人令狐士義之投書流言因而具奏恐嚇朕躬楚宗係
專守塞思黑之人將令狐士義之投書流言並塞思黑與西洋人
穆經遠從窗牖出入時常計議如許事件妄亂行爲之處盡爲隱
匿不行奏聞及朕明降諭旨伊知塞思黑罪惡深重斷不能逃於
法網乃欲自益前愆將塞思黑從西大通解來保定時並未奉朕
諭旨擅將塞思黑鎖拏以見毫不徇情之意且既稱鎖拏自應實
在加以鎖鈕又復虛應故事可以脫卸是屬何心再塞思黑一切
事件已有旨交與李紱矣伊又行攙越將塞思黑之親隨四人另
行拘禁他處楚宗之行爲甚是悖謬情殊可惡著交與常泰嚴行

審明具奏○是月免泗州水災額賦有差

九月壬辰以李成龍爲正白旗漢軍都統宜兆熊爲湖廣總督

補

州將

○癸巳宗人府參奏固山貝子滿都護屢犯大罪不知悔改

應革去固山貝子禁錮高牆得旨滿都護從寬免其圈禁著革去

固山貝子授爲鎮國公所屬之佐領俱著撤出○命直隸督撫及

府州縣有司耕藉○乙未裁甘肅屬之平涼固原慶陽臨洮河州

蘭州岷州七衛西固一所各千總缺歸併各州縣管轄○丙申諭

內閣錢文乃民間日用之所必需向因錢價昂貴朕心籌畫至再

至三今鼓鑄之錢日增而錢文不見其多錢價仍復不減是必奸

民圖利有銷毀制錢打造器皿之事若不禁止銅器則錢價究不

能平嗣後除三品以上官員准用銅器外其餘人等不准用黃銅

器皿定限三年令將所有黃銅器皿悉行報出官給應得之價如

旗人則於本旗交官領價漢官民人則於五城該管之處交官領價不論輕重多寡隨便收買不許發價之人絲毫扣剋違者重治其罪若三年之後仍有私藏黃銅器皿者亦加重處如此可永杜毀錢制器之弊而國寶流通民用充裕實爲有益著九卿確議具奏○丁酉宗人府參奏旗人虧空帑項不能賠者入辛者庫乃係定例該旗王公並卹謝恩之例輔國公阿布蘭從前訛取常泰之子銀兩今又越例妄奏應革去公爵仍行禁錮得旨阿布蘭革退輔國公禁錮之處暫行寬免將所屬佐領俱著撤出○戊戌重九節 上御乾清宮西暖閣召皇子諸王大學士以下各官九十四人賜宴賦柏梁體詩○己亥淮關監督年希堯參奏原任監督慶元貪婪劣蹟得旨慶元莅任年餘朕聞其聲名不好曾屢次詢問張大有令其據實陳奏張大有堅稱慶元秉公奉職商民皆便朕

又詢問張楷亦稱慶元居官甚善朕以二人陳奏之言自屬可信故將慶元留督淮關稅務今覽年希堯參奏慶元劣蹟多端商民含怨則從前張大有張楷徇私妄奏可知年希堯所奏慶元款蹟及伊不法之家人俱交與黃炳齊蘇勒審理○順承郡王錫保奏阿其那染患嘔證前於初一日奏聞奉旨將阿其那用心調養欲食之物悉著給與臣遵旨令太監給與調養至初五日阿其那病勢加增不進飲食初十日病故報聞○庚子以塞楞額署山東巡撫

由禮部左侍郎署

○辛丑降工部左侍郎明圖爲內閣學士○壬寅諭

內閣張楷由道員拔至巡撫理應感恩報效乃到任以後惟務沽取虛名於地方事務全不經心料理朕降旨訓飭而伊奏稱臣有潔己愛民之心無振作有爲之能大凡愛民之政莫大於察吏緝盜張楷在任縱容不肖官吏鹽梟盜賊爲害地方朕訪知貪劣不

職官員指名令其參奏伊始行參奏朕訪知鹽梟私販指名令其緝拏伊始行緝拏數年來裨益地方之事無一可稱乃公然以愛民自誇於君父之前又潔己二字乃朕獎勵臣下之語張楷何得以此自居乎且爲大吏者激濁揚清興利除害皆職分以內之事朕不知如何謂之振作如何謂之有爲朕之諄諄訓誨者不過欲地方大吏各勉其職各盡其道以爲息事甯人之本何嘗以苛刻爲能察察爲明而令督撫等生事以滋擾乎以朕綏靖地方之心而張楷視爲煩擾地方之事其意不過欲姑息優容得宵小之歡心而不顧國家之法度使名歸於己而怨歸於上尙得謂之知君臣之大義乎著將張楷革職鎖拏嚴審定擬○以鄂爾奇爲工部左侍郎由詹事遷○甲辰諭內閣古者射御居六藝之中聖人所重本朝開國以來騎射精熟歷代罕有倫比旗人凡少長貴賤悉皆專

心練習未有一人不嫻熟弓馬者士子應試必先試其騎射合式方准入闈蓋恐其專習文藝或致騎射生疏故先以此試之卽今部院堂司官亦每月如期在本旗教場該管都統佐領看練弓馬所謂有文事者必有武備勗制立法之意誠深遠也近來文官外任之人漸漸不習於騎射若聽其因循怠惰將來必致騎射生疏豈國家勗制立法之意乎凡旗人外任文官六十歲以下者限二年之內仍須熟練騎射儻二年後有不能騎射者該督撫卽行參劾若督撫徇隱經朕察知將督撫一併治罪○諭禮部明年乃會試之期春季適有閏月二月節候尙早各省舉子途次遠來及闈中考試恐其寒冷辛苦朕心軫念著將場期改至三月該部卽行文諭知之嗣後會試之年遇有閏月該部先期奏聞○禮部遵旨議奏聖祖仁皇帝忌辰每年應遵照周年祭祀之例恭讀祝文

永遠舉行得旨是○以山東登萊青三府豐稔命巡撫發帑購米分貯濟南等屬米少之州縣○丙午諭內閣大學士朱軾將至京師著學士何國宗副都統永福迎勞賜食示朕眷念之意○諭吏部州縣爲親民之官關係緊要見在投供候補候選未用之人俱屬平常用之於不甚繁劇之州縣尙可供職若任繁劇必致貽誤地方及至督撫訪察題參事務已至廢弛著將在京候補候選無論已未投供驗到各項人員查明帶領引見○以吳襄爲內閣學士

由翰林院侍讀學士遷

○以福敏署湖廣總督馬齊暫署左都御史事○

戊申移四川重慶府同知駐黔江裁酉陽司經歷一其雅州天全二司經歷瀘州九姓司吏目俱改設州同以資彈壓○壬子諭內閣賭博之事最壞人之品行若下等之人習此必至聚集匪類作奸犯科放僻邪侈之事多由此起若讀書居官之人習此必至廢

時失事志氣昏濁何能立品上進乃向來屢申禁飭而此風尙未止息深可痛恨若不嚴禁賭具究不能除賭博之源著京城內外及各省地方官將紙牌骰子悉行嚴禁不許貨賣違者重治其罪嘗有窩賭之家誘人入局以取其利嗣後准輸錢之人自行出首免其賭博之罪仍追還所輸之銀錢庶使賭博之人有害而無利則其風可以止息又見漢軍惡習常以工於馬弔互相誇尙夫旣已居官則應辦之事務甚多日夕不遑尙恐違誤安有餘閒爲此無益之戲且聞有上司與屬員鬪牌爲樂者尤非體統大玷官箴嗣後若有司官鬪牌賭博該管上司及該督撫指名題參至禁止賭博宜如何定例之處該部議奏尋議定例旗人製造紙牌骰子售賣者照光棍爲從例擬絞監候而民人止於枷責所以不知畏懼嗣後應將民人之製賣賭具及賭博者以充發杖流分別擬罪

至官員賭博者革職永不敘用從之○癸丑諭內閣大學士朱軾丁憂回籍朕本欲成全其志准其在籍守制三年但朕左右匡弼需人而營田水利工程亦係伊協同辦理之事故召令來京三年之內不補原官准其素服凡朝會燕饗及應穿補服之處俱不必到俾伊得盡人子之心以展孝思當日怡親王遭伊母妃之喪

聖祖仁皇帝恩准素服三年今日朱軾即可皆照此例著仍在內

閣兼吏部都察院行走○以查郎阿署左都御史

由吏部左侍郎署

○乙

卯諭內閣九卿翰詹科道等登闕庭向來趨附隆科多隆科多曾經薦舉朕令在內廷行走授為內閣學士後見其語言虛詐兼有狠願之相料其心術不端從未信任及禮部侍郎員缺需人蔡珽又復將伊薦舉今歲各省鄉試屆期朕以江西大省須得大員以典試事故用伊為正考官今閱江西試錄所出題目顯露心懷怨

望譏刺時事之意料其居心澆薄乖張平日必有紀載遣人查其寓所及行李中則有日記二本悖亂荒唐怨誹捏造之語甚多又於聖祖仁皇帝用行政大肆訕謗以翰林改授科道爲可恥以裁汰冗員爲當厄以欽賜進士爲濫舉以戴名世獲罪爲文字之禍以趙晉正法爲因江南之流傳對句所致以科場作弊之知縣方名正法爲冤抑以清書庶常復考漢書爲苛刻以庶常散館爲畏途以多選庶常爲葢草爲厄運以殿試不完卷黜革之進士爲非罪熱河偶然發水則書淹死官員八百人其餘不計其數又書雨中飛蝗蔽天似此一派荒唐之言皆未有之事而伊公然造作書寫至其受人屬託代人營求之事不可枚舉又有科場關節及科場作弊書信皆甚屬詭秘今若但就科場題目加以處分則天下之人必有以查嗣庭爲出於無心偶因文字獲罪爲伊稱屈

者今種種實蹟見在尙有何辭以爲之解免乎爾等漢官讀書稽古歷觀前代以來得天下未有如我朝之正者況 世祖 聖祖重熙累洽八十餘年深仁厚澤淪肌浹髓天下億萬臣民無不坐享昇平之福我 皇考加恩臣下一視同仁及朕卽位以來推心置腹滿漢從無異視蓋以人之賢否不一各處皆有善良各處皆有奸慝不可以一人而槩眾人亦不可以一事而槩眾事朕惟以至公至平之心處之爾等當仰體朕心各抒誠悃交相勉勵殫竭公忠無負平日立身立德之志或有一二心術不端者亦宜清夜自省痛加悔改朕今日之諭益欲正人心維風俗使普天率土永享昇平之福也爾等承朕訓旨當曉然明白勿存疑愧避忌之念但能恪慎供職屏去習染之私朕必知之朕惟以至誠待臣下臣下有負朕恩者往往自行敗露蓋普天率土皆受朝廷恩澤咸當

知君臣之大義一心感戴若稍萌異志卽爲逆天之人豈能逃於
誅戮報應昭彰纖毫不爽諸臣勉之戒之查嗣庭讀書之人受朕
格外擢用之恩而伊逆天負恩譏刺呪詛大千法紀著將查嗣庭
革職拏問交三法司嚴審定擬○丁巳諭內閣爲士者乃四民之
首一方之望凡屬編氓皆尊之奉之以爲讀聖賢之書列膠庠之
選其所言所行俱可以爲鄉人法則也故必敦品勵學謹言慎行
不愧端人正士然後以聖賢詩書之道開示愚民則民必聽從其
言服習其教相率而歸於謹厚或小民偶有不善之事卽懷愧恥
之心相戒勿令某人知之如古人之往事則民風何患不醇世道
何患不復古耶朕觀今日之士雖不乏閉戶勤修讀書立品之人
而蕩檢踰閑不顧名節者亦復不少或出入官署包攬詞訟或武
斷鄉曲欺壓平民或抗違錢糧藐視國法或代民交課私潤身家

種種卑污下賤之事難以悉數彼爲民者見士子誦讀聖賢之書而行止尙且如此則必薄待讀書之人而並且輕視聖賢之書矣士習不端民風何由而正其間關係極爲重大朕自卽位以來加恩學校培養人材所以教育士子者無所不至宜乎天下之士皆鼓舞奮興爭自濯磨盡去其佻達之習矣而內外諸臣條奏中臆列諸生之劣蹟請行嚴懲者甚多朕思轉移化導之法當先端其本原教官者多士之儀型也學臣者教官之表率也教官多屬中材又或年齒衰邁貪位竊祿與士子爲朋儔視考課爲故套而學臣又但以衡文爲任教官之因循怠惰苟且塞責漫不加察所以倡率之本不立無怪乎士習之不端風俗之未醇也朕孜孜圖治欲四海之大萬民之眾皆嚮風慕義革薄從忠故特簡督學之臣慎重教官之職欲使自上而下端本澂源以收實效也凡爲學臣

者務須持正秉公宣揚風化於教官之稱職者卽加薦拔溺職者卽行參革爲教官者訓誨士子悉秉誠心如父兄之督課子弟至於分別優劣必至公至當不涉偏私如此各盡其道則士子人人崇尚品詣砥礪廉隅不但自淑其身而羣黎百姓日聞善言日觀善行必共生感發之念風俗之丕變庶幾其可望也○戊午諸王文武大臣等合詞議奏阿其那塞思黑逆天大罪應戮屍示眾同黨之允禩允禪並應正法 上召入諭曰諸王大臣等所奏乃執法定罪至公之論但阿其那塞思黑旣伏冥誅其戮屍之罪著從寬免允禩乃狂妄無知之人爲阿其那塞思黑所愚入其邪黨聽其指揮尙非首惡故將伊拘禁於 壽皇殿之旁俟其悛改當日皇考拘執阿其那之時允禩與塞思黑公然挺身保奏允禩且曾邀約朕躬伊等又私藏毒藥願與同死昨阿其那身故之後朕

遣人詢問允禔云阿其那在 皇考之時爾原欲與之同死今伊身故爾若欲往看若欲同死悉聽爾意比時允禔回奏我向來爲阿其那所愚今伊既伏冥誅我不願往看等語據此則允禔似有悔心之萌或伊僞作此語欲留其身以圖將來報復均未可定著暫緩其誅以徐觀其後若竟不悛改仍蹈罪愆再行正法允禔癡庸卑鄙若將伊與阿其那等同列亦覺不稱今既已禁錮亦免其正法○是月免山東德州歷城濟南東平等四十九州縣衛所上年水災額賦有差

冬十月庚申諭內閣部院大臣等朕宵旰勤勞勵精圖治諄諄以正人心端風俗爲首務而欲人心風俗同歸於善必先去其營求請託之私而後可以成公平之化大臣者羣僚之表率也職官者士庶之儀型也大臣不能去營求請託之私則標準不立而百僚

士庶相習成風更無所底止矣外省督撫藩臬皆地方大吏其所辦理皆地方緊要之事若在京大臣以私情屬託必致進退人材不得其實聽斷獄訟不得其平種種倚仗勢力顛倒是非夤緣奔競之事皆由此起民生何由安吏治何由肅乎夫交以道接以禮聖人所不廢內外官員凡有問候書札及餽遺往來而無所干瀆者不必拒絕有關說請託者宜嚴行禁止地方大吏正當謝絕知交屬託之私情以除向來相沿之陋習在廷諸臣亦可舉國法以謝親知秉公去私共襄移風易俗之化慎之勉之○諸王文武大臣等以十月三十日恭屆萬壽聖節合詞奏請慶賀得旨朕卽位以來事事效法皇考當日皇考聖誕未曾每歲行慶賀禮是以今年朕萬壽節禮部奏請慶賀朕降旨停止蓋皇考六十年來所行之事朕力能效法者無不遵奉施行其力所不能者則

待朕黽勉於他日卽如 皇考慎重武備每歲巡行邊塞校獵講武一事朕年來未一舉行而庸劣無知之官員及怠惰不堪之兵丁頗有以朕之不往爲是者此皆愚賤之人偷安自便不知大體之論國家武備關繫緊要不可一日廢弛朕之不往乃朕不及

皇考之處朕自知之蓋 皇考德盛化神睿思廣運巡幸所至日理萬幾略無曠缺與在宮中無異朕則從朝至夕殫竭心力尙恐經理未周實無暇及於校獵行圍之事此朕不及皇考者也 皇考神武天授挽強貫札之能超越千古眾蒙古見之無不驚服而朕之騎射不及 皇考矣 皇考聖體康強如天行之常健春秋已高猶不減壯盛之時而朕之精力又不及 皇考矣是以臨邊講武之事未曾舉行祇於前歲令皇子出口行圍以習訓練而武弁及旗員引見則皆試以騎射而後用之朕欲俟經理政事悉皆

得宜卽當於農隙之時躬行獮狩之禮耳朕事事不及 皇考惟有洞悉下情之處則朕得之於親身閱歷朕在藩邸四十餘年凡臣下之結黨懷奸貪緣請託欺罔蒙蔽陽奉陰違假公濟私之習皆深知灼見可以屈指而數者是以今日宵旰憂勤爲世道人心長久之計禁之不得不嚴訓之不得不切非好爲辨論自取煩勞也其他宣猷敷政實不及 皇考之萬一惟有一事事勉效法而行如萬壽節不行慶賀禮乃事之易行者著仍遵前旨○以吏部尙書內務府總管查弼納協理兵部尙書事署正藍旗漢軍都統黃國材協理兵部侍郎事○癸亥召佟吉圖來京以許容爲浙江布政使原任陝西按察使○甲子諭九卿等朕聞浙省風俗澆漓甚於他省若不力爲整頓挽回及其陷於重罪加之以刑實有不忍朕意專遣一官前往浙江省問風俗稽察奸僞應勸導者勸導之應懲

治者懲治之務使紳衿士庶有所儆戒盡除浮薄囂陵之習歸於
謹厚以昭一道同風之治其如何設立衙門鑄給關防之處著詳
議具奏尋議查唐貞觀中置觀風俗使巡省天下觀風俗之得失
今遣官前往浙江省問風俗稽察奸僞應授爲浙江等處觀風整
俗使鑄給關防以重職守從之○諭禮部直省學臣三年任滿著
於各學生員內選擇人品端方有猷有爲有守之士大省舉四五
人小省二人送部引見酌用○以光祿寺卿王國棟爲浙江觀風
整俗使○丙寅諭纂修 實錄總裁官大學士張廷玉朕閱康熙
四十九年 實錄內載 皇考褒獎朕之諭旨云朕之諸子多令
人視養惟四阿哥朕親撫育能體朕意愛朕之心殷勤懇切可謂
誠孝當時降 旨原有幼年微覺喜怒不定一語朕曾奏曰臣侍
皇父左右時蒙訓誨頃者復降 褒綸實切感愧至於喜怒不

定一語昔年曾蒙 皇父訓飭此十餘年以來 皇父未曾降旨
飭臣有喜怒不定之處是臣省改微誠已荷 皇父洞鑒今臣年
逾三十居心行事大槩已定喜怒不定四字關係臣之生平仰懇
聖慈將 諭旨內此四字恩免記載隨蒙 皇父傳諭曰十餘
年來實未見四阿哥有喜怒不定之處頃朕降旨時偶然諭及無
非益加勉勵之意此語不必記載今朕繼承大統臨御寰區凡一
喜一怒皆慎之又慎未敢輕忽如或尚有不定處足見 皇考知
人之明評論不爽如朕已無喜怒不定之處是朕仰遵 廷訓時
時體察得以陶鎔氣質 皇考訓誨之恩尤不敢忘也爾等可將
當日 皇考降旨及朕奏懇蒙 恩俞允前後情節據實添載
實錄中○諭內閣助教一官有教訓士子之責若止考試繕寫則
年少淺學但工寫字者皆可入選何能得人可傳諭各部院衙門

將滿字筆帖式內爲人老成有品行者保舉引見其應考繙譯者仍照例考試○丁卯調郝林爲禮部左侍郎

由工左調

○刑部等衙門

議奏楚宗胡什禮奉旨帶領塞思黑回京並不請旨擅將塞思黑鎖拏又復故意寬鬆任其脫卸明係懷挾奸邪暗庇逆黨應照例將楚宗擬斬監候胡什禮擬絞監候得旨楚宗從寬免死發往阿爾泰種地處效力胡什禮從寬免死在黏竿處效力○浙閩總督高其倬奏報蘇祿國王遣使奉表貢獻方物已抵閩界得旨蘇祿國遠在海外隔越重洋從來未通職貢今輸誠嚮化甚屬可嘉閩省起送來京之時著沿途地方官護送照看應用夫馬食物著從厚支給以示朕加惠遠人之至意○添設浙江杭嘉湖三府分巡道一○戊辰諭諸王大臣等我皇考聖祖仁皇帝臨御六十餘年富有四海而躬行儉德撙節愛養以爲保惠萬民之本此中外

臣民所共知者從來宮中服御之具惟尙質樸無華至於古玩器皿皆尋常平等之屬竟無一物爲人所罕見可珍奇者此等事朕向來且不深知則外廷臣工又何從而知之朕卽位後偶令太監將大內所有玩器稽查檢點並將避暑山莊等處歷年陳設之物其中可觀者皆取回宮中看來較朕藩邸所藏尙屬不逮益欽服我 皇考之至德卽此一節已超越前古矣偶因閒暇憶及實不忍 皇考盛德異日湮沒而不彰特書此以留示子孫俾知 皇考之節用愛人戒奢崇約不獨溥鴻恩於萬姓亦且留厚福於子孫而世世追思 聖德祇遵 聖訓敬謹奉行毋稍踰越此又人所當自勉者也○己巳諭大學士九卿等直隸地方旗民雜處往往以強陵弱勢力相加而謹樸良民常被欺壓因而相習於強悍之風不知悛改俗不醇厚或由於此朕勵精圖治欲四海之廣

道德一而風俗同況輦轂之下首善之區尤當整飭化導以爲萬邦之式今欲將滿漢漢軍御史各差二員令其巡查直隸八府地方凡旗下告退官員及在屯之莊頭內監之族戚與在籍之鄉紳衿監儻有不安本分陵虐良民不畏官吏恣行暴悍者或卽行懲治或具本參奏其地方命盜案件亦聽其查訪務使豪強斂迹良善安居以副朕移風易俗之至意其如何遣官分巡之處爾等妥議具奏○辛未諭戶部朕覽所奏恩詔內賞給老人一項直隸各省七十以上至百歲以上老民老婦共一百四十二萬一千六百二十五名其仕宦紳士商賈僧道皆不入此數內洪範以壽居五福之首而昔人稱七十爲古稀誠以壽爲難得而可貴也乃今日老人之多至於如此皆由我 皇考聖祖仁皇帝六十餘年以來深仁厚澤休養生息凡山陬海澨僻壤窮鄉無不沐浴 鴻慈涵

滿大化太和翔洽壽國壽民所以期頤耄耋龐眉皓首之人至數
百餘萬之多所謂老者以壽終幼孤得遂長者皆我 皇考之賜
也從此益加培養日積月累則民間之享高年介眉壽者更不知
如何之眾矣此等老人躬際昌期年登上壽大抵皆居心忠厚力
行善事之人卽或有一二年少時未盡醇謹者亦必中年暮齒能
自悔悟蓋一念修省卽荷上天福佑也是國家有培養之恩而本
人又能修善以祇承之非倖而致之者也爾等百姓觀太平之盛
事當歡欣鼓舞謹身修德以迓天庥父與父言慈子與子言孝兄
弟友恭夫婦和順比閭族黨之間相親相愛無詐無欺革薄從忠
循分守法盡除乖戾之氣爲國家醇樸善良之民則天地佑善錫
福長享遐年此必然之理也但生齒日盛食指繁多則謀生之計
不可不講爾等百姓當重農桑以順天時勤開墾以盡地利務本

業以戒游惰謹蓋藏以裕久遠而且節省食用愛惜物力毋尙奢侈毋競紛華毋任意糜費以耗有用之財毋但顧目前而忘經久之計朕以勤儉先天下宮禁之中尙多方撙節愛養以爲加惠元元之本爾等小民安可忘物力之艱難乎誠能體朕諄諄訓諭之意敦善行則心體安務本計則俯仰足惜財用則家室裕人心和樂風俗醇美同爲壽考之人長享昇平之福朕蓋有厚望焉著該部將朕此旨轉發直省督撫通行所屬郡邑鄉村咸使聞知○壬申諭戶部錢糧之有火耗原非應有之項但以相沿日久地方官員非此無以養贍故姑且存之而各省舊例亦有輕重之不同儘地方官員於應取之外稍有加重者朕必訪聞重治其罪向來山西省虧空甚多地方官無以藉口動稱因豫備軍需所致並將侵蝕之人皆指爲軍需之用及諸岷到任加意整頓盡革從前之加

派而各屬無著之虧空不能填補者則將各官應得耗羨歸之於公以爲酌補虧空之計又恐各官無以養廉以致苛索於百姓故於耗羨中酌定數目爲日用之資以官員之羨餘補官員之虧空既可完帑亦不累民實權宜得中之善策也前聞伊都立將通省火耗應減者皆出示裁減朕甚嘉之近日又聞伊都立以用度不敷竟不奏聞而將已減之耗羨仍舊徵取經朕訪聞尙不肯深信因降旨詢究務令照前裁減今伊摺奏竟係實有之事認咎無辭伊都立如此暮四朝三前後矛盾同於兒戲可乎夫以封疆大臣不能宣揚德意使小民知朕恤下之恩而反爲此悖理營私之事昏庸若此豈事君理民之道伊都立著交部嚴加議處○諭刑部逃人在外生事被人毆死與尋常鬪毆不同不應擬抵庶使逃人知所儆懼爾部卽知會各省遵行○癸酉降兵部尙書蔡珽爲奉

天府府尹○甲戌諭大學士九卿翰詹科道等爾等多出自科甲
之人既誦法聖賢讀書明理當知君臣之大義須上下一體情分
相聯方克致昇平之治人人共受其澤自唐宋以來去古已遠習
俗澆漓人心詐僞狂妄無忌憚之徒往往腹誹朝政甚至筆之於
書肆其誣謗如汪景祺查嗣庭豈能逃於天譴乎我國家恩養休
息海宇晏清八十餘年萬民樂業卽爾等父母妻子孰不沐浴膏
澤安享其福耶且士人立身行己以禮義廉恥爲重乃至昏夜乞
憐上書投札滿紙稱功頌德之語何廉恥蕩然至於此極又有將
子弟姻戚門生故舊私書請託者不知以素所親愛之人爲之請
託照拂實屬無益而有損益彼無倚恃尙知儆惕自守勉勵供職
若先有請託彼心以爲勢力可恃肆其狂妄無所不爲及實在贖
款發覺則受請託者不能爲之庇護是非所以愛之而實以害之

也又爾等皆係各省州縣之百姓受制於有司者如請託之風盡除凡地方有司皆有所畏懼而廉潔愛民則爾等之子孫宗族咸受其慶不亦善乎如請託之風不絕則地方官員各有倚賴將肆其貪婪則爾等之家產不足飽貪官汚吏之谿壑爾等自爲身家桑梓計亦斷應速改厯代之陋習也查嗣庭請託賄屬之書札不一而足其日記所載狂妄悖逆之語與汪景祺相爲表裏而其譏議聖祖仁皇帝用人行政大逆不道之言不可勝舉實共工驩兜之流也復有無知之徒謂朕進人太驟退人太速者朕在藩邸時從未與外廷諸臣往還卽認識者甚少及卽位後有內外員缺甯能不用人乎而素無認識之人不得不博採旁求以用之及用之而徐觀其人實不可用則不得不更易之故自督撫提鎮至於道府參遊州縣每一缺出苟不得其人朕將吏兵二部月摺翻閱

再四每至終夜不寢必得其人方釋然於中此爲君之難實不可以言語形容者也又有議朕求治太速者朕受 聖祖仁皇帝付託之重實欲治益求治安益求安以仰副 聖祖仁皇帝養育深恩然於臣下辦理政務從未嘗刻期促限也但勵精圖治欲使天下臣僚振作奮興去其怠玩上下交相勸勉庶底於有成苟此志稍有或弛則庶務積而叢勝矣朕自朝至夕凝坐殿室披覽各處章奏目不停視手不停批訓諭諸臣日不下數千百言悉出於至公至正之心如從前政令果有未協之處爾等能直陳其非朕卽爲改定有獨見者卽昌言之或公同詳議具覆此時不言日後私相議論發覺之日必治以重罪勿謂朕求言之不誠也○諭禮部士子讀書制行之道首在明經其以五經取中副榜者必有志經學之士著將今年各省五經取副榜之人俱准作舉人一體會試

再今科各省所中副榜內有兩次中副榜者亦准作舉人一體會
試此係特典後不爲例○丁丑覺羅塞德緣事革職調塞楞額爲
戶部右侍郎莽鵠立爲禮部右侍郎以圖理琛爲兵部右侍郎調
法敏爲陝西巡撫以馬會伯爲四川巡撫由甘肅提督遷○解丁士一任
以王承烈爲江西布政使由湖北糧道遷○戊寅諭九卿等各部漢司官
實能辦事者不過一二人其餘庸碌無能之人偷惰安閒實屬充
濫朕卽位以來其賢能司官或升道府或選科道擢用甚眾而平
庸之人若一槩升用必致曠官廢事然尙不忍多行黜退蓋以各
司人眾兼有堂官辦理事無貽誤故今春京察止將甚不堪者革
退數人其餘槩爲優容此朕寬大之恩也乃汪景祺查嗣庭等妄
謂郎中員外主事等官壅滯不得升轉至有白首爲郎十年不調
等語此必司官中有不感朕寬容之恩而以不得升用私相怨望

者此等之人既不能爲國家效力而反以不得卽升爲怨又復多
占員缺阻塞後人升補之路甚非整飭官方之道著各部堂官將
所屬司官詳加甄別凡有才具平常目前不能辦事將來不堪升
用者盡行舉出與應留辦事人員一同帶領引見請旨各部堂官
不得瞻徇情面稍有容隱○諭雲貴川廣湖南各省督撫直省地
方官辦理欽部案件皆有定限其不依限完結者例有處分惟邊
省苗疆間有督撫自行歸結之案地方官因無限期遂生怠玩以
致案件稽遲民人受其拖累嗣後遇有民苗爭訟事件皆督撫嚴
飭該管各官作速查審完結如地界兩省或有關提之人或有會
勘之處兩省大吏務須和衷辦理不得互相推諉其有不肖有司
託故稽遲巧爲推卸者卽指名題參毋得徇庇○添設直隸河官
天津州同一青縣子牙河主簿一屬天津道轄涿州霸州州判各

一吏目各一宛平良鄉固安永清東安武清六縣縣丞各一主簿各一屬永定道轄北運河同知通判各一要兒渡縣丞一東陽村主簿一屬通永道轄霸州清河吏目一屬清河道轄○己卯命大學士馬齊爲正使領侍衛內大臣馬武爲副使齎冊寶封和碩怡親王諡怡親王誠敬事君公忠體國自古賢王罕與倫比數年以來遇王之生辰與遷移府第朕每次加以恩賚之期及遣王祭祀行禮奉差起程之日朕留心觀之天氣必暄和爽朗今日冊封更覺風和日暖足見朕之加恩上合天意而人臣之純一恪恭者天必降之福澤其理昭然不爽非人力所能強致也朕心甚爲嘉悅將此旨傳諭諸王大臣○辛巳諭宗人府裕親王廣甯朕授以王爵並不感恩報效反懷異志退避不前辦事錯謬朕降旨切責伊全無畏懼之容尙未除保泰等朋黨之念甚屬可惡著拏交宗人

府嚴加議處尋議廣甯身受隆恩由閒散宗室封爲親王又授爲
領侍衛內大臣乃不思感恩效力反懷異志所議藍翎侍衛一案
甚屬錯謬 皇上降旨切責並無畏懼之容結黨營私有干國紀
應將廣甯革退王爵在臣衙門永遠鎖禁得旨廣甯著永遠鎖禁
宗人府○壬午以戶部尙書蔣廷錫兼管兵部尙書事○癸未調
彭維新爲河南按察使魏定國爲直隸按察使○甲申諭議政大
臣等岳鍾琪見今經理剿撫善番苗事務地連三省必須岳鍾
琪前往四川就近調遣方能悉合機宜著岳鍾琪親赴川省駐紮
成都以便相機調度或於此時卽便起程或俟法敏到陝後起程
令岳鍾琪酌量辦理○實授鄂爾泰雲貴總督加兵部尙書銜○
乙酉轉吏貽直爲工部左侍郎以劉師恕爲工部右侍郎鄭任鎔
爲左副都御史憲德爲湖北巡撫蔡嵩爲湖北按察使

由翰林院
侍讀遷

○解汪澥任以邁柱署江西巡撫

由吏部右侍郎署

○丁亥諭大學士九

卿等朕自卽位以來以皇考之心爲心以皇考之政爲政寬

嚴賞罰之間止此一理而愚昧無知之人陳奏摺內往往將皇

考與朕之行事強爲分別有春溫秋肅仁育義正之語其意謂

皇考爲寬仁謂朕爲嚴義何其謬歟帝王爲治之道有應寬者則

用寬而非廢法應嚴者則用嚴而非濫刑古人云寬以濟猛猛以

濟寬惟寬嚴得當乃爲相濟朕經理萬幾用寬用嚴皆因其人之

自取物來順應初無成見惟斟酌情理之至當而行之天下惟此

一理諸臣須知朕今日之義卽皇考當日之仁朕今日之仁卽

皇考當日之義道無二致同歸一中因時制宜使得其平此聖

人所以言平天下也朕臨下御眾悉本至誠爾內外諸臣亦當體

朕之心務實存誠秉公持正去私心揣度之陋習佐寬嚴得中之

雅化行之恒久將刑措之風可以復見而太和翔洽民物長春永登邛隆之盛治實朕之所期望也○是月免湖北沔陽武昌等州縣衛湖南臨湘岳州等縣衛水災額賦有差

十一月辛卯諭大學士等各省學政有教導士子之責關係甚重乃向來定例由翰林科道簡用則爲學院由部屬簡用則爲學道不論其見任之職掌但論其前任之官職似未允當應作何畫一之處著會議具奏尋議郎中等官奉差督學者應一體稱爲學院停其開缺各以原銜督學差滿後仍歸衙門辦事得旨凡郎中等官奉差提督學政者若原缺不行另補恐部中辦事乏人所議尙未周詳朕意凡部內郎中等官膺督學之任則加以編修檢討之銜使其名實相稱其員缺另行銓補俟伊任滿考察之後仍歸本部補用如此庶爲妥協著九卿定議具奏○調伊都立爲江西巡

撫以德明爲山西巡撫張迺爲直隸布政使

原任甘肅按察使

○乙未靖

邊將軍富甯安自軍營回京帶領官弁陞見諭富甯安在軍前多年約束兵丁辦理事務俱井井有條而且行止端方廉潔此數年以來領兵之將軍等聲名未有出其右者其於我皇考之寄任實心奮勉不負任使朕實嘉愛今朕代皇考推恩特行旌賞封富甯安世襲侯爵爾諸大臣果能以品行聲名爲念於國家公務一意抒誠勉盡人臣效忠之道豈惟主上嘉愛卽上天亦必慈佑報之以福矣○吏部遵旨議覆御史分巡直隸應令都察院於滿洲漢軍漢人御史內各派出二員差往其各員巡察之處分順天各屬及永平宣化二府爲一路保定正定河間三府爲一路順德廣平大名三府爲一路每路派御史二員徧歷巡查凡旗下告退官員在屯莊頭內監族戚及在籍鄉紳矜監並內府莊頭如有恣

行不法者卽行文該地方官提拏訊實懲治其應交地方官歸結者卽會同地方官歸結應參奏者卽行參奏並請鑄給關防以重職守如該御史徇私容隱以及生事滋擾仍許直隸總督據實題參從之○己亥諭內閣帝王體國經邦政治所施惟準乎道理之至當寬嚴賞罰各得其宜若一涉利弊二字便入於私是以孟子云仁義而已矣何必曰利蓋仁所以休養安全義所以裁成化導也朕嗣承大統四年於茲凡政教號令皆遵法 皇考 皇考在位六十一年 聖謨宏遠 諭旨周詳紀綱法度靡不備舉特當時臣下或有陽奉陰違不能實力遵行者或有事經歷久漸至廢弛者朕在藩邸時知之甚悉卽位以來仰體 皇考仁育義正之心屢降明旨諄諄誥誡無非欲內外大小臣僚咸恪遵 皇考之良法美政貞心奉行以共成久安長治之盛是朕所行之政皆一

皇考已行之章程朕所申之令皆 皇考已申之寶訓實未嘗有所減省增益也特以歷年既久新進疏遠之臣未能悉知見朕所施之政令遂以爲從前所未有而淺陋寡識之人往往於陳奏內有眾利皆興諸弊俱除之語朕經理天下凡用人行政悉本大中至正之心事至而應惟理所當然從無計及利弊之私意如謂興利除弊則凡平治道路疏濬河渠修葺城垣開墾田畝此國家經野之常典而可謂之興利乎年歲豐歉不齊設有水旱爲之賑饑平糶蠲賦緩徵此朝廷軫恤之恒政而可謂之興利乎老人應賜以衣食則賜之孤獨應恤以錢物則恤之勸以孝弟本小民自有之天良勸以耕桑固閭閻各盡之職業而可謂之興利乎至於盜賊奸宄法所應誅貪官污吏法所應黜豪紳劣衿法所應鋤而謂誅盜奸黜貪污鋤豪劣爲除弊可乎情罪重者予以刑辟情罪輕

者予以矜釋此又謂之除弊可乎欲正民風而端士習不得不戒之用休董之用威也將以此爲興利乎抑除弊乎念習俗之流於奢靡也朕躬行節儉以身示天下慮農人之惰於南畝也朕親爲耕藉以身先天下將以此爲興利乎抑除弊乎夫存興利之心卽有不利之害有除弊之意卽爲啟弊之端由此類推治道安得有利弊之名朕又何常有興利除弊之舉也 皇考六十餘年豐功偉烈布在方策皆因事治事以人治人從不居興利除弊之名而以此頌揚朕之政事朕實不敢當朕亦不願當也外省督撫諸臣未能深悉朕意爲此曉諭知之○賑廣東歸善博羅等縣水災饑民○大學士高其位以老疾乞休得旨卿效力年久恪慎奉職老成練達懋著賢聲是以簡預機務用昭優眷前以老病乞休朕未忍俞允特命供職數時以示眷念耆舊大臣之至意今復行奏請

情詞懇切准以原官致仕○辛丑兵部遵旨議覆州縣民壯中有材力技藝出眾者請與見在之步戰兵守兵一體比較拔補馬步戰兵額缺又議准原任山東巡撫陳世倌奏衛所歸併州縣原爲便於地方起見東省安東等七衛及已裁之雄崖浮山二所俱係海疆重地形勢險要請將該衛所照舊存留無庸裁併其濟南衛所與海疆不同請裁歸附近州縣管理均從之○癸卯諭大學士等朕覽九卿所議欲停夥盜減等發遣一案當日將夥盜分別減等乃 皇考聖祖仁皇帝好生至德從古未有之仁政也若照律不分首從皆斬立決則受戮者甚多其中不無應酌量矜減之人是以夥盜減等立法誠爲盡善朕惟照舊遵行但行之既久地方官吏捕役人等悉知此例或將愚劣無能之輩嚴刑逼迫令其認爲造意爲首之人反將奸狡積盜入於夥盜之中得邀減等亦未

可定凡盜案內必有實在爲盜者亦有被人誘脅並非素常爲盜情尙可憫者若將實在強盜拏獲卽行正法不但法無不當且盜案亦不至於併積當日 聖祖仁皇帝未將夥盜減等之條著爲定例原有深意但旣施法外之仁通行年久朕意將此條另立檔案首載 聖祖仁皇帝諭旨次將凡因盜案所下諭旨存案遵行嗣後遇有盜案務令地方各官詳察情形確實究審將案內之悍惡兇暴實在爲盜及被人誘脅或出於一時救死之計並非素常爲盜者一一分註明白於疏內聲明著大學士會同三法司將造意爲首與極惡難留者仍按律擬斬其被人誘脅或非素常爲盜情尙可憫有應行減等發遣者將應減等緣由於本內聲明具題至發遣之地亦不必於黑龍江甯古塔等處應如何分發各省內地之處爾等公同詳細議奏○丙午裁湖南永順保靖二司經歷

缺各改設同知一○庚戌存柱緣事降調調葬鵠立爲刑部右侍

郎由禮部調

○禮部左侍郎郝林以老疾乞休命加尙書銜致仕○辛

亥禮部議准原任總督管山西巡撫事伊都立奏 關聖後裔在

洛陽者已設守墓博士一其後裔在解梁原籍者實係太宗請增

設博士一以奉祭祀從之○改廣西太平府屬之江州太平萬承

龍英慶遠府屬之東蘭思恩府屬之田州等六州吏目俱爲州同

太平府屬之安平憑詳思恩府屬之向武等三州吏目俱爲州判

添設慶遠府屬之南丹州州同一那地州州判一○王子封大學

士富甯安三等侯世襲○癸丑諭內閣滿洲風俗尊卑上下秩然

整肅最嚴主僕之分家主所以約束奴僕者雖或嚴切亦無不相

安爲固然及見漢人陵替之俗彼此相形而不肖奴僕遂生觖望

雖約束之道無加於疇昔而向之相安者遂覺爲難堪矣乃至一

二滿洲大臣漸染漢人之俗亦有寬縱其下漸就陵替者此於風俗人心大有關係不可不加整飭夫主僕之分一定則終身不能更易在本身及妻子仰其衣食賴其生養固宜有不忍背負之心而且世世子孫長遠服役亦當有不敢縱肆之念今漢人之奴僕乃有傲慢頑梗不遵約束加以訶責則輕去其主種種敝俗朕所洞悉嗣後漢人奴僕如有頑傲不遵約束或背主逃匿或私行訛謗被伊主覺察者應作何懲治與滿洲待奴僕之法作何畫一之處著滿洲大學士九卿詳悉定議具奏尋議漢人奴僕有傲慢不遵約束及訛謗家長背主逃匿者俱照滿洲家人例治罪如典當雇工限內及身隸門下爲長隨者照滿洲白契所買家人例治罪從之○何錫祿緣事革職以趙殿最爲湖南按察使由給事中遷○乙卯諭九卿等讀書所以明理講求天經地義知有君父之尊然後

見諸行事足以厚俗維風以備國家之用非僅欲其工於文字也
浙江文詞用於天下而風俗澆漓敝壞已極如查嗣庭汪景祺自
矜其私智小慧傲睨一世輕薄天下之人遂至喪心悖義謗訕君
上以 聖祖仁皇帝六十餘年聖德神功深仁厚澤普天率土浹
髓淪肌 聖敬日躋純亦不已用人行政至公至正事事周詳盡
善實自古帝王中所罕見者而查嗣庭汪景祺乃敢肆行謗議悖
逆猖狂公然紀載誰無君父能不痛心能不切齒昔孔子作春秋
歷代因之各有史冊以垂法戒今若容悖逆之人顛倒是非私行
紀載則史冊皆不足憑矣豈非千古之罪人乎浙江風氣如此儻
聽其頽敝不加整飭何以成一道同風之治朕思開科取士原欲
得人任用豈徒以其文章詞藻之工有益於民生吏治乎且巡撫
李衛等從查嗣庭家中搜出科場懷挾細字密寫文章數百篇似

此無恥不法之事不但藐視國法亦且玷辱科名浙江士子未必不因此效尤應將浙江人鄉會試停止俟風俗漸趨醇樸再降諭旨至於生員歲考仍舊舉行朕因人心風俗關繫重大不得不嚴加整理以爲久安長治之計也○諭吏部江西各州縣倉糧民欠虧空不清著伊都立會同邁柱清查巡撫印務仍著邁柱署理查出虧空之州縣照直隸之例俱令解任留於本處賠補賠補全完者具題給咨赴部另補所遺員缺卽將命往之人題補事竣日將巡撫印務交與伊都立邁柱再行來京○丁巳冬至祀天於圓丘上親詣行禮畢諭諸王大臣等今日未祭之前大雪及行禮時微止行禮畢雪復大作此實上天垂佑之象朕心甚慰爾諸大臣諒亦必共相慶幸也○是月免江南宿松無爲望江銅陵等州縣江西南昌等縣湖南巴陵等縣水災額賦有差

十二月戊午朔四川巡撫法敏奏建昌所屬苗獮種類不一冕山賊蠻金格關壽阿租等狂悖不法從前並未殲其兇首因調漢土官兵分路進剿而金格等潛匿山箐茲又添兵深入梁山搜捕除各處調來土兵量給口糧外查官兵內地行走無支給口糧之例但官兵深入崇山峻嶺購米維難與出口無異請暫照松潘戍守兵丁之例支給口糧於官兵應領米折銀兩陸續扣還得旨向來官兵凡在內地行走者例不給與口糧朕思內地亦有遠近之分行走不無遲速之別宜酌加恩澤以獎勵勤勞今建昌官兵因進剿賊蠻已經深入梁山此地舊稱險遠並非內地可比而賊徒金格等潛匿荒僻之區尙未授首見在官兵各處搜剿奮勇效力甚屬可嘉查前歲進剿南坪時官兵俱經給與口糧今進剿梁山官兵著照南坪之例一體支給口糧以示朕撫恤兵丁之至意○庚

申康親王崇安等奏請將大逆不道之阿其那塞思黑妻子正法
得旨阿其那塞思黑心懷不軌亂我國家大奸大惡不忠不孝造
背主逆天之大罪諸王大臣遵依國法請將阿其那塞思黑妻子
按律正法理所當然從來史冊中反叛篡逆之人則有之而未叛
之先卽公然敢與君上抗拒大逆不道無人臣禮如阿其那塞思
黑年羹堯者實自古未聞也但阿其那塞思黑之大逆不道雖著
而反叛之事蹟未彰其妻子從寬免其正法塞思黑之妻逐回其
家嚴加禁錮阿其那塞思黑之眷屬交與內務府總管給與住居
養贍四保既係過繼尼雅哈母之人著仍留伊家○辛酉命河南
丁銀攤入地糧內徵收○癸亥以唐執玉爲禮部左侍郎由宗人府承
遷○戶部議准川陝總督岳鍾琪奏陝甘兩屬應徵丁銀請攤於
地畝徵收以雍正五年爲始著爲定例其以衛改縣未經載丁及

原有丁銀者按其額賦均載丁銀至陸續開墾及見今新開渠開屯墾之處亦照此糧額一例增載再川省地方多係以糧載丁間有數州縣以人載丁之處亦應查改盡一從之○甲子御史謝濟世參奏河南巡撫田文鏡營私負國貪虐不法十罪得旨田文鏡秉公持正實心辦事乃天下督撫中所罕見者貪贓壞法之事朕可以保其必無而謝濟世於天下督撫中獨參田文鏡朕不知其何心從前聖祖仁皇帝見科道官員朋比作奸互結黨羽潛通聲氣罔利徇私屢降諭旨切責至再至三朕卽位以來令滿漢文武諸臣及科道等官皆用密摺奏事蓋欲明目達聰盡去壅蔽以收實效也而科道等官所密陳者未見有裨益政治之事是以停止密摺令其專用本章猶恐惡習尙存頽風不改諄諄訓誡往復周詳誠以欲正人心端風俗必自科道始科道無私方能彈劾人

之有私者若自恃爲言官胸懷詭詐聽人指使顛倒是非擾亂國政實大有害於人心世道爲國法之所斷不可容朕豈不知誅戮諫官史書所戒然審其緩急權其輕重誅戮諫官之過小而釀成人心世道之害大也古人云禮義不愆何恤於人言朕爲天下主豈恤此區區之小節而忘經國之遠圖哉謝濟世若不嚴行訊問則鬼蜮之伎倆得行於光天化日之下人心何由正風俗何由端乎著將謝濟世革職令大學士九卿詹事科道等嚴訊務將其中實情審出具奏○浙江總督李衛查奏李維鈞家產得旨李衛清查李維鈞家產不徇情面洵屬可嘉但參奏李維鈞婢妾一節未免過刻不合大體此事不必議戮凡大臣審理公務止當就事論事不必於事外苛索攻發人之陰私朕常見好發人之陰私者往往因己身行事有愧於心故意揭人之過以掩己之短如年羹堯

素性貪婪往往以貪婪之名加之於人朕以忠厚之道教天下著
將此訓諭李衛知之○乙丑刑部等衙門遵旨審奏謝濟世參劾
田文鏡各款自認風聞無據顯係聽人指使要結朋黨擾亂是非
謝濟世應擬斬立決疏入 上召入大學士九卿翰林詹事科道
等諭曰科道乃朝廷耳目之官果能秉公持正據實敷陳方合天
下之公是公非而於朝廷政事有所裨益昨日謝濟世參劾田文
鏡貪贓壞法等事今日朕特面詢爾等滿漢大小臣工僉云田文
鏡並無貪婪之事謝濟世所參各款皆虛可見公道在人難於掩
蔽矣夫身爲言官背公懷私朋比結黨將造作並無實據之浮言
轉相買屬恣憑糾彈以洩私忿而報宿怨令無知狂悖之人愚弄
指使借風聞言事之名以酬報私恩小惠則顛倒是非擾亂國政
其有害於人心風俗者不淺我 聖祖仁皇帝神明天縱深知其

弊屢頒

諭旨嚴加訓誡停止風聞言事蓋以人君圖治固貴於

明目達聰而無稽之言勿聽勿詢之謀勿庸則訪聞不確者尙不

可採而況於構黨傾陷此風豈可長哉朕在藩邸時從不識田文

鏡之面並不知其姓名因雍正元年年羹堯來京陛見時言山西

年歲歉收宜早爲賑恤朕因降旨與巡撫德音令其查奏而德音

回奏稱山西去年收成甚好道途亦無饑民實無可賑濟之處時

適田文鏡告祭華山回京復命將山西通省荒歉情形激切敷陳

備極周詳朕以田文鏡係告祭之員經過山西地方閭閻疾苦非

伊責任乃目擊民瘼直言無隱深屬可嘉若非忠國愛民之人何

能如此因遂令田文鏡往山西任賑濟之事田文鏡到彼盡心竭

力辦理甚妥卽以田文鏡爲山西布政使令其與諾岷料理山西

一應未清案件二人秉公和衷將積年虧空及地方宿弊剔除清

理吏治整飭一新嗣因河南諸事廢弛故將田文鏡調爲河南布政使旋卽用爲河南巡撫朕之所以擢用田文鏡原委如此及任巡撫後三年以來整飭河工隄岸堅固河汎安瀾年歲豐稔紳衿畏法正己率屬地方甯謐而每事秉公潔己謝絕私交實爲巡撫中之第一李紱自廣西來京陛見時卽奏田文鏡參劾黃振國汪誠邵言綸甚爲冤抑張球居官聲名甚劣田文鏡並不糾參且言黃振國此時已爲田文鏡監斃滅口矣未幾黃振國已從河南解赴來京依然無恙朕不知李紱受何人意指而捏造此不稽之言敢於冒昧陳奏也至田文鏡所參黃振國各案皆係田文鏡自行奏請遣大臣前往審理朕因差侍郎海壽史貽直到豫將各案重審皆已究詢明白定擬具奏其張球一案田文鏡早經認過請罪部議亦於張球盜案內將田文鏡處分夫督撫統轄通省地方甚

廣屬員甚眾其居心辦事安能盡保其無過田文鏡始而誤信張球爲可用旣而察其不肖卽據實參奏亦可以解其從前誤用之愆若必追究已往借端苛責則督撫大吏將何道而始能免於指摘乎至汪誠邵言綸皆係庸劣不堪之人田文鏡參奏處並無冤抑乃謝濟世所言黃振國張球邵言綸汪誠等事與從前李紱自廣西來京陛見時所奏一一脗合朕思封疆大臣能爲朝廷實心任事卽爲國之棟梁朕之股肱若不爲保護而任人傾陷則朕何顏對天下封疆大臣乎況從前特頒諭旨言天下巡撫中實心任事不避嫌怨爲國爲民者惟田文鏡李衛楊文乾三人謝濟世聽人指使將田文鏡糾參顯與朕之明旨相悖且田文鏡並不可謂之權要亦斷不能加以貪污之名而謝濟世爲此參奏者其意不過欲使天下督撫皆因循苟且庸碌偷安邀眾人之虛譽保一己

之身家而不爲國家實心效力以快其黨錮之私心此種結黨營私排擠傾陷之惡習不可不嚴加懲治是以令內閣九卿等公同研究務得實情今內閣九卿等審問謝濟世時將伊所奏田文鏡各款逐一究訊謝濟世皆茫無憑據俯首無詞則其受人指使情弊顯然謝濟世既自命爲報效國家之人著革職令往阿爾泰軍前效力贖罪此案亦免深究前朕曾降諭旨凡天下官員有被上司參劾冤抑者許令赴都察院控訴若黃振國汪誠邵言綸關陝被參果屬冤抑何不遵旨赴都察院辨理乃黃振國汪誠邵言綸暗結黨援將本身所犯之罪巧爲掩飾鑽營李紱密奏今又指使謝濟世挺身陳奏關陝以行賄被劾乃不安本分屬託佟鎮寄信隆科多在朕前稱揚其善以圖僥倖在黃振國挾勢婪贓狂妄不法已罹重罪而汪誠邵言綸關陝等處分不過罷官何至要結黨

與請託權要必欲更翻前案報復私讎實爲法所難容是以將黃振國汪誠置之重典邵言綸關隲發遣邊衛充軍朕素性不嗜殺人但此奸惡之風不得不懲一以儆百實爲人心風俗計也半月以前朕面諭九卿翰詹科道戒以結黨營私徇情請託言之可謂諄切矣今尙有無理妄奏如謝濟世可見此風一時難於悛改而朕之所以姑寬謝濟世者蓋以不教而殺實所不忍教而不久朕亦不忍卽加誅也爾等諸臣皆由科甲出身將來爲督撫爲學政果能公忠體國朕必當加恩保護斷不使萋菲之人得行其傾陷之計儻懷私挾詐顛倒是非朕亦決不姑貸凡此構黨排陷之風朕必加整頓者乃正所以爲爾等諸臣之身家子孫保全久遠之計若諸臣果能遵朕訓旨凡事秉公持正合乎公是公非則上下一心君臣合德永享昇平之福豈不美與諸臣當共勉之○丙寅

上命 皇四子 莊親王允祿視馬武疾諭馬武抱病危篤聞之深爲悽惻馬武事我 皇考五十餘年朝夕侍奉不離左右恪恭謹愼事事能仰體 聖心每當盛暑嚴寒隨從勤勞並無幾微倦怠之色朕幼齡時伊抱扶服事備極小心其情事宛然如昨伊爲人雖未讀書而侍從 皇考數十年如一日其功甚大朕追念 皇考凡係昔年侍從之人皆加恩眷況馬武乃年齒最高效力最久 聖眷最渥之人是以朕聞其病勢沉重悲傷垂涕不能自己屢次降旨欲親身前往看視諸大臣合辭勸阻至再至三不得遂朕之願朕尙望其痊可儻伊病果不起著照伯爵賜與卹典賞銀一千兩並給與世襲阿達哈哈番以示朕優眷老臣之至意○丁卯署湖廣總督福敏等奏請將通省州縣各官酌調繁簡次第調換以便盤查倉庫錢糧諭湖廣一省舊無調繁調簡之例卽他

省亦未經通行朕踐阼以來督撫諸臣往往密爲奏請此舉若出於至公原屬美政儻涉於私比則其弊不可勝言矣所以朕不輕開此例卽一時權宜行之惟視督撫之公私何如而斟酌於其間耳朕意調繁自必皆勤幹之員至於調簡或亦偶有抱屈者然大都姑容徇庇之舉居多地方繁簡固有不同卽就極簡州縣而論莫不皆有刑名錢穀之責其間其劣員安可任其曠官貽誤乎若不過僅短於才而無蕩檢踰閑之處宜勒令退休係科甲出身者或題請改教卽如月選各官引見時朕觀其人雖似不及但豈得以語言相貌一見而定其優劣遂將無過之人卽行斥革是以姑且補授令其莅任是在爾等督撫大吏秉公衡鑑明試以功也朕反復思維吏治須嚴爲甄別若係庸材斷宜沙汰試思一人之榮辱得失較之國計民生輕重何啻倍蓰向來姑容陋習近於婦人

之仁欲沽此寬厚之虛名實不知乖激揚之大典也地方惟良吏
難得果係有爲有守之員遇因公呈誤參劾仍不妨另爲題留設
遇下艱事故揆其情理如非孤子或亦可在任守制給假數月俾
得盡其子道然後赴任儻該員報本念切堅欲奔赴則不必強或
具本題請於服滿之日仍留本省遇缺卽用如此方爲鼓勵人材
之道今爾楚省牧令中察有精勤能幹之員而在僻地者用違其
才誠爲可惜爾等題請調繁可也至於才短而任衝繁之地欲爲
調簡者當仰遵朕諭加意斟酌而行均將與例不符情節備細聲
明題奏又所奏次第調換盤查倉庫之說似可不必儻或不肖有
司彼此互相容隱反致爾等難於查察矣亦何益之有○戊辰實
授陳時夏江蘇巡撫○壬申雲貴總督鄂爾泰奏黔省狎苗兇悍
長寨等一帶尤甚焚毀劫擄視爲慣常所劫男女又有川販沿途

接應故兇燄日熾臣委調官兵進剿兇苗川販窩黨見今擒獲陣斬首級九顆所獲器械什物無算攻破者三十六寨投誠者二十一寨招撫苗民五百餘戶三千餘口又查出熟田五千八百餘畝熟地一萬四千五百餘畝荒地九千六百餘畝各造清冊臣隨遵旨審理安插地方甯謐得旨數百年以來狎苗兇悍不法擾害平民今鄂爾泰石禮哈馬會伯率領弁兵前往剿撫成功甚速地方俱已甯謐永無苗人騷擾之患甚屬可嘉著將鄂爾泰等從優議敘在事官員兵丁俱著照軍功例議敘如有用兵之時退縮不前者著嚴察議奏○癸酉戶部遵旨議覆兩浙鹽商輸銀積貯應照兩淮鹽義倉之例於杭州府地方建倉買米積貯隨時平糶從之○甲戌吏部奏大學士富甯安蒙恩賜爵三等侯照例請將從前所得拜他喇布勒哈番歸併授爲一等侯世襲罔替從之○乙亥

九卿遵旨議覆部員奉差督學員缺另行銓補其加銜照庶吉士散館授職之例該員係二甲進士出身者加以編修職銜係三甲同進士出身者加以檢討職銜一體稱爲學院任滿仍候本部員缺補用從之○丙子諭都察院及五城御史等制錢乃日用之所必需務使充足流通始便民閒之用國家開局年年鼓鑄而京師錢文不見加增外省地方亦未流布是必有銷毀制錢製造器皿以致錢文短少錢價日昂朕念切民生屢降諭旨而錢價仍未平減是以禁用黃銅器皿凡民間所有俱給價令其交官以資鼓鑄此悉心籌畫專爲民間資生使用起見並非朕有需用銅斤之處而廣收民間之銅器於內務府也似此有益於民間之事卽當踴躍急公欣然交納使錢文盈餘日用贍足尙何待於上官稽查催促耶況銅器交官皆如數領受價值又何樂而不爲且民間器皿

非必定需黃銅製造其在有力之家則白銅紅銅皆非難得之物而無力之家如木盆甃器價廉工省亦未嘗不適於用非若錢文爲人人所萬不可缺者與其將黃銅器皿藏匿於家將來限滿三年犯禁獲罪何如彼此相勸早爲交納旣得價值而又受錢價減省之利益乎著將此旨通行曉諭其咸體朕意毋忽○諭刑部從來監斃人犯多由獄官疏忽一任禁卒陵偏所致若使本犯有應死之罪又當別論其軍流以下輕罪之人瘐斃在獄甚屬可憫嗣後監斃不應死之輕犯與應死之重犯其處分似應分別輕重著爲定例其犯輕罪之人在獄患病者應否保釋調治再督撫題報監斃人犯本內務將本犯情罪病故緣由聲明無令蒙混著九卿一併議奏○丁丑諭多羅順承郡王錫保等正黃旗滿洲副都統宗室鄂齊自委任之後竭力行走此番差往西藏辦事明白著將

伊父鄂飛未襲輔國公爵給與鄂齊承襲○內閣等衙門議覆雲貴總督鄂爾泰奏流官固宜重其職守土司尤宜嚴其處分應分爲三途盜由苗寨專責土司盜起內地責在文員盜自外來責在武職查土司等官世受厚恩理宜謹遵法度約束苗裸乃日久藐視並不實心管攝遇有殺人劫擄之事知情故縱受賄隱藏若不嚴定考成勢必益無忌憚嗣後除命盜案件照例處分外如有故縱苗裸擾害土民者該督撫將該土司奏請革職另行承襲至有養盜殃民者題參嚴拏治罪儻能嚴行約束擒拏盜賊奏明加級以示鼓勵至於文武官弁均有地方之責嗣後盜起內地則文員爲專責官武職爲兼管官照例分別降調若盜自外來則以武職爲專責官以文員爲兼管官亦照例治罪再清盜之源莫善於保甲雲貴苗民雜處戶多畸零將零戶編甲獨戶遷移附近以便稽

查之處行令該督悉心籌畫飭令該地方官善爲奉行安置得法
又設立捕快汛兵原以稽查匪類嗣後督緝賊盜逾限不獲將捕
快與快頭一併責比治罪至塘兵有酬頑賭博及偷竊等事按律
加倍治罪若文官縱捕殃民武弁不整飭塘汛卽題參從重議處
並行令雲南貴州四川廣西湖南五省一併遵行從之○工部遵
旨議覆山東與河南接壤之曹縣定陶曹州單縣城武等處所近
黃河地方凡一切修築隄岸等工程俱請交與副總河嵇曾筠就
近管轄從之○命船廠地方添立永吉州設知州州同吏目學正
各一甯古塔地方添立泰甯縣白都納地方添立長甯縣各設知
縣典史教諭一俱隸奉天府轄○戊寅黃河清○禮部右侍郎魏
方泰以衰老乞休允之○己卯以和碩淑慎公主下嫁觀音保授
爲和碩額駙○晉封科爾沁固山額駙輔國公拉錫爲貝子○庚

辰諭內閣年來冬月封印之後政務畧有餘閒朕手書福字賜內
外大臣諸臣奏謝皆稱受朕賜福之恩此世俗之言非正理也朕
何能以福賜諸臣哉不但朕也卽上天亦豈能以福私與一人哉
書曰惠迪吉從逆凶又曰天道福善禍淫易曰積善之家必有余
慶詩曰自求多福古聖人之垂訓深切著明如此從來善惡之報
如影隨形福緣善慶視乎其人之自取他人不能助纖毫之力也
且所謂福者不在乎富貴貧賤之間有富貴人之福有貧賤人之
福或貧賤之人循理守分無患無憂其心志安舒四體暢適轉在
富貴人之上是人人各有其福也朕之每年頒賜福字者蓋欲諸
臣觸目儆心時時存可以獲福之心行可以獲福之事如詩人之
所言自求多福則諸福集於其身矣諸臣又常言賴朕之福此言
亦屬非是蓋必諸臣皆有福方爲朕之福是朕實賴諸臣之福也

又必天下百姓皆有福然後爲吾君臣之福是君與臣皆賴百姓之福也願與諸臣共勉修福之道可耳○諭戶部尙書蔣廷錫在內廷侍從二十餘年恪慎勤勞實心效力朕御極以來凡交與部院事務皆能悉心辦理明晰妥協簡任農曹尤爲稱職素性篤於孝道其母身享高年蔣廷錫朝夕承歡奉養惟謹朕優眷大臣推恩及於其母時加存問賜賚載頒今聞其母奄逝深爲軫惻特遣大臣前往賜奠茶酒加恩諭祭一次照生前例給與一品太夫人封誥並賜銀一千兩爲殯殮之資以示朕教孝勸忠之至意○辛巳以工部左侍郎史貽直倉場侍郎托時俱兼理戶部侍郎事○晉封青海貝勒益蘇克汪扎爾爲郡王○壬午以何天培爲兵部尙書毛文銓爲江南京口將軍常賚爲福建巡撫官達爲廣東布政使

由光祿寺卿遷

○以李紱爲工部右侍郎調宜兆熊署直隸總督○

以福敏署湖廣總督調工部右侍郎劉師恕爲禮部右侍郎協辦

直隸總督事○宋瑋患病解任以方願瑛爲廣東按察使

由惠潮道遷

○癸未諭內閣朕卽位以來視滿漢臣工均爲一體時時訓誨以

君臣之閒務敦元首股肱一體聯屬之實心而不在於儀文度數

之末至於上之賜賚於下下之進獻於上不過藉微物以表誠意

之交孚若誠意不孚而徒事虛文則大非君臣一體之道也朕三

年以來素服齋居從未令進獻至上年八月三年之期已滿十月

爲朕萬壽節在廷諸臣有進獻書籍筆墨文玩之事朕以諸臣之

意出於誠懇若一概拒卻恐無以聯上下之情而成泰交之誼故

其物雖極輕微樸陋朕亦鑒其忱悃收納一二此朕優待臣工曲

體下情之深恩並非因其進獻之物可適於內廷之用而收納也

旋已命停止羣臣之進獻矣朕之視爾諸臣實不啻家人骨肉是

以偶有食用之物朕亦不論物之輕重遇便卽行頒賜如論語所記賜食賜腥古人早已行之朕實出於一片待下之誠心豈藉此鼓勵望其報效乎向來年節之時 聖祖仁皇帝以口外所進鹿豕雉兔之類頒賜諸王外其餘止及於漢大學士及內廷供奉之翰林則其優待漢人者如此朕踵而行之徧及於在廷大臣無非家人父子歲時伏臘歡欣浹洽之意不在微物也乃查嗣庭私編日記譏訕朝政而於賞賜進獻之物則以無爲有以少爲多將來散布流傳必致外人議論卽於楊名時李紱何世璠甘汝來等所進之物奏單見在李紱甘汝來又因不收再三奏懇觀其所獻俱堪一笑此亦非伊等今日所進偶涉菲薄乃向日之例大率皆然我 聖祖仁皇帝六十餘年諸臣進獻之物不過如此天下人所共知者蒙 聖祖寬大包涵之度鑒其微忱不遺葑菲所收率多

筆墨箋紙書冊之類恩誼可謂至矣假若有悖逆狂妄如查嗣庭之誣妄記載者六十餘年之久又不知如何訛言也不幾以聖祖恤下宏仁而反啟僉壬之訾議乎朕事事率由舊章祇因查嗣庭之妄行訛謗是以有禁止漢官進獻之旨卽年節賞賜之事朕意亦躊躇蓋恐照舊行之或啟無知小人之議論若將進獻賞賚概行停止又將謂朕之待下過於嚴峻無以聯上下之情而不合於聖祖之政此雖細微之事中有關繫朕不得不加詳愼著將甘汝來奏摺並李紱等進獻奏單發與漢大學士九卿閱看議奏尋漢大學士九卿等援據舊典合詞具奏內外官員進獻及廷臣常年賞賜懇請仍照舊例得旨此朕愼重之意惟恐以濫賞啟人議論又恐因進獻開詄媚之端故令漢大臣等會議具奏今覽所奏援引舊典情詞懇切著照所請行至於諸臣進獻之事外任大

臣自古有進獻方物之理今仍准其進獻但所進之物必令廷臣共知之在內諸大臣原無方物可獻若以慶賀令節之期視爲成例相率進獻朕概不收納朕前所降諭旨甚明仍著遵行○諭署湖廣總督福敏朕原命爾暫署督篆俟宜兆熊一到交代卽還昨宜兆熊來京陛見看伊精神力量甚覺勉強楚督節制兩省文武任鉅事繁統轄匪易且又不識一字但其操守尙優而心術亦正藹然有忠君愛國之誠爲可取耳朕茲令伊督理直隸事務以試觀可否兩湖重寄一時不得其人故欲將爾多留一兩年以經畫之爾其從容次第料理可也一兩年之久係朕約略言之若一得人卽命往替令爾旋都不必亟思赴闕致亂心曲近日廊廟中頗乏卿貳滿臣皇子左右亦需爾來輔翬留爾在楚乃出於不得已也宜仰體朕意勉力爲之○河道總督齊蘇勒奏臣於睢甯工次

忽見黃河之水湛然激清隨據河營守備朱錦等呈報自河南虞城縣至江南桃源縣共六百餘里於本月十六十七十八等日河水激激並無濁流兩岸士民紛紛稱瑞洵屬千古罕覩之奇徵臣不勝懽躍之至疏入報聞○甲申諭禮部嗣後自外省來京之大臣已入班者在伊本班坐未入班者在班末各按品級坐著爲定例○丙戌河道總督齊蘇勒疏朱家口決口合龍得旨嘉獎加齊蘇勒太子太傅○是月免湖南澧州江南江甯宣城南陵邳州宿遷雖甯等縣衛被災額賦有差○是歲蘇祿國來貢○是歲人丁戶口二千五百五十七萬九千六百七十五又永不加賦滋生人丁八十一萬一千二百二十四田地山蕩畦地八百九十六萬八千六百五十四頃十七畝有奇徵銀二千九百五十四萬六千四百一十八兩有奇米豆麥四百九十二萬九千三百三石有奇草

四百九十萬六千五百三十三束茶三十萬七千七百七十引行
鹽四百九十八萬三千五百三十九引徵課銀三百八十六萬三
千九百三兩鑄錢六十七萬五千一百六十有奇